

## Seini se Mèpiya Indan Insolat i Marcos

*Pegtoladà i Juan Memonyagay*

*Mar. 1:1-8; Mat. 3:1-12; Luc. 3:1-18; Juan 1:19-*

28

<sup>1</sup> Seini se keteboan te Mèpiya Indan tepad te Batà te Timanem, si Jesu Cristo. <sup>2</sup> Gebii doen insolat te telekeliwat te kagi te Timanem si Isaias,

“Na, doen otaw isogò ko megpetaga-taga te agpet ka den domateng, amon megpeketa-gad se kedita te otaw te pegdateng nikaw.

<sup>3</sup> Dinegen niyo se otaw doton te kebigtilan aw dakel se kagi din, ‘Pegpeketa-gad kaw te pegdateng te Pengolo. Peg-inang kaw te metòlid, so domateng sikandin.’ ”

<sup>4</sup> Nayan, dimoton si Juan Memonyagay te kebigtilan. Migtoladà sikandin te kedita te otaw te keilangan megselsel dan te salà ininang dan aw bonyagan dan amon ipetaga-taga dan te pigwedad den te Timanem se salà dan. <sup>5</sup> Medita se otaw lekat te menge lonsod sakop te probinsya te Judiya aw lekat te Jerusalem dimoton amon menenalan kandin. Migselsel dan te menge salà ininang dan, aw binonyagan din dan doton te wayeg te Jordan.

<sup>6</sup> Nayan, egpenaol si Juan te saol inabel lekat te bolbol te ayam-ayam kamilo, aw egpengelen te kindal te ayam-ayam. Egpengànen din se menge dolon aw teneb eg-ebaten din doton te kebenesan.

<sup>7</sup> Migtoladà sikandin, kagi din, “Doen domateng

labi pa melangkaw diyà kanak. Kenà botong se ke-  
langkaw ko amon megtelaban a kandin pengkey  
meglebad a te sepatos din, so ontò sikandin  
melangkaw diyà kanak. <sup>8</sup> Nemonyag a kenyo pi-  
neokit te wayeg, meneng sikandin se memonyag  
kenyo pineokit te Espiritu Santo.”

*Pegbonyag aw pegboyo ki Jesus*

*Mar. 1:9-13; Mat. 3:13-4:11; Luc. 3:21-22; 4:1-13*

<sup>9</sup> Nayan, wedà kenamay, dimateng si Jesus  
lekat te lonsod te Nasarit sakop te probinsya te  
Galiliya, aw migpebonyag sikandin ki Juan kidoen  
te wayeg te Jordan. <sup>10</sup> Peg-anggin i Jesus lekat te  
wayeg, pegketà kinità din se langit neowang aw  
migpedanà se Espiritu Santo diyà kandin iling te  
selepati. <sup>11</sup> Penga niyan, dinineg dan se kagi te  
Timanem lekat te langit, “Sikona se Batà ko. Dakel  
se pedowan ko kamno, aw ontò a neluba kamno.”

<sup>12</sup> Penga niyan, inibing sikandin te Espiritu  
Santo doton te kebigtilan. <sup>13</sup> Mig-ogpà sikandin ki-  
doen taman te kepatan se aldaw, aw binoyo peden  
i Satanas. Doen menge menenanap te kebenesan  
dimoma kandin, meneng doen menge anghil mig-  
ipat kandin.

*Pegtebò i Jesus migtoladà doton te Galiliya*

*Mar. 1:14-15; Mat. 4:12-17; Luc. 4:14-15*

<sup>14</sup> Nayan, penga te pegpedakep i Herod ki Juan  
Memonyagay, dimoton si Jesus te probinsya te  
Galiliya aw migtoladà te Mèpiya Indan lekat te  
Timanem. <sup>15</sup> Minikagi sikandin, “Netoman den se  
aldaw tapay impakang, aw agpet den lomowan se  
Timanem diyà kenyo. Pegselsel kaw den te menge

salà ininang niyo, aw pemenal kaw den te Mèpiya Indan.”

*Pegtawal i Jesus te epat tinoledaan*

*Mar. 1:16-20; Mat. 4:18-22; Luc. 5:1-11*

<sup>16</sup> Nayan, minipanaw si Jesus doton te kilid te lanaw te Galiliya. Kinità din se didowa memokotay si Simon aw adi din si Andres nemokot. <sup>17</sup> Timawal si Jesus, “Taking kaw kanak, so meg-toladà a kenyo amon kenà ikan se meabat niyo, meneng otaw se ibingen niyo diyà kanak.”

<sup>18</sup> Pegketà, tinenanan dan se pokot aw timaking dan ki Jesus.

<sup>19</sup> Penga niyan, dimeleg si Jesus te kenà mediyò, aw kinità din si Santiago aw adi din si Juan didowa dan batà i Sebedeo. Kidoen dan te belangay aw migtigmes dan te pokot. <sup>20</sup> Pegketà, tinawal dan heman i Jesus. Tinenanan dan se amay dan kidoen te belangay sipat menge doma otaw egten-danan din, aw timaking dan heman ki Jesus.

*Otaw dinetengan te bosaw*

*Mar. 1:21-28; Luc. 4:31-37*

<sup>21</sup> Penga niyan, dimoton dan te lonsod te Kapir-naom. Pegkesebado, dimoton si Jesus te simbahan te Judiyo aw migtoladà kidoen. <sup>22</sup> Ontò nepela se kedita te otaw dimineg te intoladà din, so kenà iling te pegtoladà te menenoladà te punù ingkeli-wat i Moises se pegtoladà i Jesus, so tinekingan si Jesus te tolos.

<sup>23</sup> Pegketà, dimateng kidoen te simbahan se otaw dinetengan te bosaw. <sup>24</sup> Timawal sikandin, “Tay, Jesus tege Nasarit. Ikà eg-inabut kenami. Ikà

egbaet kenami. Netegahan ko aw sinu ka. Sikona se metòlid otaw insogò te Timanem.”

<sup>25</sup> Meneng migsagda si Jesus te bosaw, kagi din, “Kepenek ka den. Lowà ka den diyà kandin.”

<sup>26</sup> Impekeseg te bosaw se otaw aw timawal te dakel se kagi din, aw penga niyan limowà diyà kandin. <sup>27</sup> Nepela se kedita te otaw, aw migpebelaw-belaway dan, kagi dan, “Tay law. Sebad se ipegtoladà din. Metolos sikandin, so aw megpelowà sikandin te menge bosaw, egtolò dan kandin.”

<sup>28</sup> Wedà kenamay, ontò nedengeg si Jesus ki-doen te kedita te ogpeanan medapag doton te probinsya te Galiliya.

*Pinegolì i Jesus se medita otaw*

*Mar. 1:29-34; Mat. 8:14-17; Luc. 4:38-41*

<sup>29</sup> Wedà kenamay, nesayo si Jesus lekat te simbahan te Judiyo aw dimoton te balay i Simon aw si Andres. Timaking heman si Santiago aw si Juan.

<sup>30</sup> Nayan, netigdaan se ogangan i Pedro bayi piglegenaw, aw inindanan dan si Jesus tepad kandin.

<sup>31</sup> Penga niyan, dimoton si Jesus kandin, aw minawid te belad din, aw impeenaw din. Migkèpiya sikandin, aw penga niyan mig-inang te kànen i Jesus aw menge doma din.

<sup>32</sup> Pegsallep te aldaw sỳan, inibing dan doton ki Jesus se kedita te otaw doen mesakit aw otaw dinetengan te bosaw. <sup>33</sup> Ontò medita se tege Kapirnaom netipon doton te lowà te balay.

<sup>34</sup> Pinegolian din se medita otaw doen medita kemolò te mesakit, aw medita heman se bosaw impelowà din lekat te otaw. Meneng sinagda i

Jesus se menge bosaw amon eked dan ikagi, so netegahan dan aw sinu sikandin.

*Migtoladà si Jesus doton te Galiliya*

*Mar. 1:35-39; Luc. 4:42-44*

<sup>35</sup> Pegkeiselem niyan te wedà pa libtak se aldaw, minenaw si Jesus aw dimoton te wedad otaw eg-ogpà, aw migtawal-tawal doton. <sup>36</sup> Meneng nengemahà si Simon aw menge doma otaw kandin. <sup>37</sup> Pegkità dan kandin, minikagi dan, “Pinengemahà ka te kedita te otaw.”

<sup>38</sup> Meneng minikagi si Jesus, “Domeleg kidon den doton te menge doma lonsod amon megto-ladà a heman doton, so yan se doun te dimini a.”

<sup>39</sup> Yan timeped sikandin te kedita te lonsod doton te probinsya te Galiliya, aw migtoladà ki-doen te menge simbahan te Judiyo, aw impelowà din se menge bosaw lekat te otaw.

*Pinegolì i Jesus se tompigun*

*Mar. 1:40-45; Mat. 8:1-4; Luc. 5:12-16*

<sup>40</sup> Nayan, doen otaw pigtompig dimoton ki Jesus, aw migpeido-ido diyà kandin. Limongken heman sikandin aw minikagi, “Aw doen ibeg nikaw, netegahan ko te mekebatog ka megpegolì kanak.”

<sup>41</sup> Neido si Jesus aw nemaed kandin, aw minikagi, “Meibeg a. Kegolian ka.”

<sup>42</sup> Pegketà, negolian sikandin. <sup>43-44</sup> Ontò migpunù si Jesus kandin, kagi din, “Keilangan wedad palos otaw indanan no tepad te ininang ko kamno. Meneng doton ka te pengolo te simbahan, aw pekitai se lawa no diyà kandin. Penga niyan, begayi se ibowang no iling te impunù i Moises

amon metaga-tagaga se kedita te otaw te negolian ka den.”

Penga niyan, impekesayo sikandin i Jesus. <sup>45</sup> Meneng pegkesayo din, medita se otaw inin-danan din tepad te ininang i Jesus kandin. Yan se doun te wedà pekeokit si Jesus te menge lonsod so pelaban medita se otaw metipon. Yan miglegeb sikandin doton te ogpeanan mediyò te lonsod, aw medita se otaw dimoton kandin lekat te kedita te ogpeanan.

## 2

### *Pinegolì i Jesus se otaw kenà egpekeiwal*

*Mar. 2:1-12; Mat. 9:1-8; Luc. 5:17-26*

<sup>1</sup> Nayan, peglaklak te pila aldaw, minolì si Jesus doton te Kapirnaom. Doen menge otaw dimineg te mig-ogpà sikandin diyà te balay kidoen. <sup>2</sup> Yan medita se otaw netipon doton didalem te balay igsà wedà pekeombà se menge otaw pengkey doton te lowà te balay medapag te lelebangan. Dalem te pegtoladà i Jesus kandan te kagi te Timanem, <sup>3</sup> dimateng se epat otaw neningga te otaw kenà egpekeiwal. <sup>4</sup> Wedà dan pekedapag diyà ki Jesus so ontò medita se otaw netipon. Yan nenayit dan doton te atep te balay siyan, so pantal se atep niyan. Inowang dan se atep kidoen diatas i Jesus, aw intonton dan se otaw kenà egpekeiwal sipat inibatan din. <sup>5</sup> Pegkità i Jesus te ontò dan simalig diyà kandin, minikagi sikandin diyà te otaw kenà egpekeiwal, “Elew, pigwedad den se salà nikaw.”

<sup>6</sup> Nayan, doen menge menenoladà te punù ingkeliwat i Moises nenenuo kidoen, aw mig-aneng-aneng dan, <sup>7</sup> “Eked kepakay se inikagi din siyan. Migtompuyus sikandin te Timanem, so wedad mekebatog megwedad te salà meneng olò Timanem.”

<sup>8</sup> Nayan, netegahan i Jesus aw eden se aneng-aneng dan, aw yan minikagi sikandin, “Nengà lay egdowa-dowa se aneng-aneng niyo? <sup>9</sup> Mola megpelingo-lingo se otaw megwedad te salà. Meneng eked pekebatog se otaw megpegolì te otaw kenà egpekeiwal singed aw doen tolos te Timanem diyà kandin. <sup>10</sup> Meneng so Timanem a Migpekeotaw, ipekità ko den kenyo te mekebatog a megwedad te salà te otaw dini te tanà.”

Penga niyan, minikagi si Jesus diyà te otaw kenà egpekeiwal, <sup>11</sup> “Enaw ka. Loloni se inibatan no, aw olì ka den.”

<sup>12</sup> Yan minenaw sikandin, aw inibing din se inibatan din, aw tinengtengan sikandin te menge otaw se minoli. Yan se doun te nepela se kedita dan, aw induyun dan se Timanem. Migpebelaw-belaway dan, “Wedad palos kinità tadon iling kenyan.”

### *Pegtawal i Jesus ki Levi*

*Mar. 2:13-17; Mat. 9:9-13; Luc. 5:27-32*

<sup>13</sup> Pegkesayo i Jesus lekat te balay, todà sikandin dimoton te kilid te lanaw. Netipon se kedita te otaw diyà kandin, aw migtoladà sikandin kandan.

<sup>14</sup> Pegkesayo i Jesus lekat kidoen, doen iskribinti si Levi batà i Alfeo nenenuo kidoen te opisina din. Pegkità i Jesus kandin, minikagi sikandin, “Taking ka kanak.”

Yan timindeg si Levi, aw timaking sikandin ki Jesus.

<sup>15</sup> Penga niyan, kimaen si Jesus kidoen te balay i Levi, aw medita heman se menge iskribinti aw doma otaw nelegeb te salà kimaen doma i Jesus aw menge tinoledaan din, so medita se otaw iling kenyan timaking ki Jesus. <sup>16</sup> Doen heman kidoen menge menenoladà te punù ingkeliwat i Moises sakop te menge Parisiyo. Pegkità dan te kimaen si Jesus doma te menge iskribinti aw doma otaw nelegeb te salà, minikagi dan diyà te menge tinoledaan i Jesus, “Medaet iyan, so egpengaen sikandin doma te medaet otaw, menge iskribinti aw doma otaw nelegeb te salà.”

<sup>17</sup> Meneng pegdineg i Jesus te inikagi dan, minikagi sikandin, “Kenà otaw wedad mesakit se bolongen te doktor, meneng otaw doen mesakit se bolongen din. Insogò a dini kenà amon tewalen ko se otaw eg-aneng-aneng te metòlid se eg-inangen dan, meneng insogò a dini amon tewalen ko se otaw mekesesalà.”

*Tepad te pegpowasa*

*Mar. 2:18-22; Mat. 9:14-17; Luc. 5:33-39*

<sup>18</sup> Nayan, egpowasa se menge tinoledaan i Juan, aw egpowasa heman se menge Parisiyo. Doen menge otaw dimoton ki Jesus aw minikagi dan, “Melikit egpowasa se menge tinoledaan i Juan, aw egpowasa heman se menge tinoledaan te Parisiyo. Nengà lay kenà egpowasa se kamno menge tinoledaan?”

<sup>19</sup> Minikagi si Jesus, “Aw doen peipid, eked kepuluk se menge sigalak te meama peipiden dalem



te kidoen pa sikandin. <sup>20</sup> Meneng doen aldaw domateng aw meabat lekat kandan se meama peipiden, aw yan se aldaw megpowasa dan so mepuluk dan.”

<sup>21</sup> Mig-indan heman si Jesus te tegdeyanan tepad te kaling itoladà din, kagi din, “Eked kepakay aw tompalan se tapay penenaktun te kaling tila wedà pa bugsaki, so komotot se kaling tila aw itompal diyà te tapay, aw meinang labi pa dakel se lisi te saol. <sup>22</sup> Aw meg-inang heman se otaw te bino, eked din soli se temek te paras diyà te solanan ininang lekat te kindal te kambing tapay linanit, so aw megbohak se temek, megbetò se solanan tapay linanit, aw eleg kebàtan se bino aw solanan niyan. Yan keilangan isawol se temek inangen bino diyà te solanan kaling linanit.”

*Tepad te aldaw te peg-etod*

*Mar. 2:23-28; Mat. 12:1-8; Luc. 6:1-5*

<sup>23</sup> Nayan, Sebado se aldaw te peg-etod te menge Judiyo. Pegkesebado, minokit si Jesus aw menge tinoledaan din kidoen te kilid te pawà te trigo agpet den geniyan. Peg-okit dan kidoen, kimetel se menge tinoledaan din te oway te trigo, aw kinaen dan, so binallos dan. <sup>24</sup> Meneng minikagi se menge Parisiyo diyà ki Jesus, “Tay law. Mig-inang se menge tinoledaan no te salà, so doen punù ingkeliwat i Moises te keilangan eked kidon pegterbaho te aldaw te peg-etod.”

<sup>25</sup> Minikagi si Jesus, “Kenà medaet se ininang dan. Nelibelan niyo den besi aw eden se insolat kidoen te kagi te Timanem tepad te ininang i David gebii dalem te si Abiatar se ontò pengolo

te simbahan. So binallos si David aw menge sondalo timaking kandin, aw wedad palos kànen dan, <sup>26</sup> yan minawop sikandin diyà te balay te Timanem, aw kinaen din se pan imbegay diyà te Timanem. Yan heman se impekaen din te menge doma din. Pengkey doen punù ingkeliwat i Moises te mepakay olò iyan kànen te menge pengolo te simbahan, meneng kenà medaet se ininang i David.”

<sup>27</sup> Minikagi heman si Jesus, “Migpunù se Timanem te doen aldaw te peg-etod kenà amon doen kelimahan te otaw, meneng amon doen kèpiyaan te otaw. <sup>28</sup> So siak se Timanem Migpekeotaw, mepakay aw siak se mikagi aw eden se mepakay inangen pengkey aldaw te peg-etod.”

### 3

#### *Pinegolì se otaw nekepis se belad din*

*Mar. 3:1-6; Mat. 12:9-14; Luc. 6:6-11*

<sup>1</sup> Nayan, dimoton si Jesus te simbahan te Judiyo. Doen otaw kidoen nekepis se belad din. <sup>2</sup> Kidoen heman se menge otaw nengemahà te idimanda dan tepad ki Jesus, aw yan se doun te gayed dan migsimà kandin aw megpegolì sikandin te otaw doen mesakit te aldaw te peg-etod. <sup>3</sup> Minikagi si Jesus diyà te otaw nekepis se belad, “Diyà ka kanak.”

<sup>4</sup> Penga niyan, minikagi si Jesus diyà te menge otaw timengteng kandin, “Tepad te punù ingkeliwat i Moises, eden lay se mepakay inangen tadon te aldaw te peg-etod? Meg-inang kidon lay te

mèpiya, aw meg-inang kidon te medaet? Megtabang kidon lay te doma otaw, aw mengimatay kidon te doma?”

Meneng wedad palos intaba dan. <sup>5</sup> Timengteng si Jesus diyà te kedita dan, aw neopal sikandin so nelidò se pedowan din tandà te kagsen te olo dan. Penga niyan, minikagi sikandin diyà te otaw nekepis se belad, “Oladi se belad nikaw.”

Peg-olad din te belad din, pegketà migkèpiya iyan. <sup>6</sup> Penga niyan, nesayo se menge Parisiyo, aw migpebelaw-belaway dan sipat menge sakop i Herod tepad te inangen dan amon matay dan si Jesus.

*Medita se otaw timaking ki Jesus*

*Mar. 3:7-12; Mat. 12:15-21; Luc. 6:17-19*

<sup>7</sup> Nayan, nesayo si Jesus aw menge tinoledaan din lekat kidoen aw dimoton dan te kilid te lanaw. Medita se otaw timaking kandan lekat te probinsya te Galiliya. Doen heman menge otaw lekat te probinsya te Judiya, <sup>8</sup> aw tege Jerusalem, aw lekat te probinsya te Idumya, aw lekat dipag te wayeg te Jordan, aw medita heman lekat te kedepagan te lonsod te Tiro aw Sidon. Pegdineg dan tepad te kedita te kepelahan ininang i Jesus, dimoton dan kandin. <sup>9</sup> Sagwa ontò medita se otaw netipon, migpunù sikandin te menge tinoledaan din te megpetagad dan te belangay sekayan din amon eked sikandin sigpiti te menge otaw. <sup>10</sup> Medita se otaw pinegolian din, aw yan medita se otaw doen mesakit migpeegaway se migpedapag diyà kandin amon memaed dan kandin aw kegolian dan. <sup>11</sup> Dimoton heman kandin se menge otaw dinetengan te bosaw. Pegkità dan kandin,

limongken dan diyà kandin aw timawal dan te dakel kagi, “Sikona se ontò Batà te Timanem.”

<sup>12</sup> Meneng ontò migpunù si Jesus te keilangan wedad doma otaw indanan dan tepad kandin.

*Sempolò teg dowà sogounun i Cristo*

*Mar. 3:13-19; Mat. 10:1-4; Luc. 6:12-16*

<sup>13</sup> Nayan, timikedeg si Jesus te bontod, aw tinawal din se menge otaw pinemallì din, aw dimoton dan kandin. <sup>14</sup> Penga niyan, doen sempolò teg dowà otaw pinemallì din aw iningedanan din dan menge apostol, amon gayed dan tomaking kandin, aw yan se insogò din megtoladà te Mèpiya Indan. <sup>15</sup> Imbegay din diyà kandan se tolos amon megpelowà dan te bosaw lekat te otaw. <sup>16</sup> Seini se menge ngadan te otaw pinemallì din, si Simon iningedanan i Jesus ki Pedro, <sup>17</sup> aw didowa batà i Sebedeo si Santiago aw adi din si Juan. Yan se telekedowa iningedanan i Jesus ki Boanerges. (Se kelebadan niyan, “kenà telawun.”) <sup>18</sup> Pinemallì din heman si Andres, si Felipe, si Bartolome, si Mateo, si Tomas, si Santiago batà i Alfeo, si Tadeo, si Simon meyseg, <sup>19</sup> aw si Judas Iscariote, siyan migtolok ki Jesus.

*Si Jesus aw si Satanas*

*Mar. 3:20-30; Mat. 12:22-32; Luc. 11:14-23; 12:10*

<sup>20</sup> Penga niyan, minolì si Jesus. Meneng wedà sikandin pekekaen aw menge tinoledaan din so medita se otaw todà netipon kidoen kandin. <sup>21</sup> Pegdineg te menge kedomaan i Jesus te wedà sikandin pekekaen, dimoton dan kandin amon

ibingen dan sikandin doton te balay, so doen menge otaw eg-ikagi te migkebook sikandin.

<sup>22</sup> Doen menge menenoladà te punù ingkeliwat i Moises tikedo te Jerusalem simila ki Jesus, kagi dan, “Dinetengan sikandin i Belsebul, se doma ngadan i Satanas. Pengolo te bosaw se nemegay kandin te tolos amon megpelowà sikandin te bosaw lekat te otaw.”

<sup>23</sup> Meneng tinawal dan i Jesus, aw minikagi sikandin diyà kandan pineokit te tegdeyanan, “Eked kepakay aw megpelowà si Satanas te menge bosaw sinekopan din. <sup>24</sup> Simpana megbebolaw se sakop te sebad selotan, kebàtan se peglowan te selotan siyan te eked kenamay. <sup>25</sup> Simpana megbebolaw se otaw migsebad te balay, kebàtan se ogpeanan dan te eked kenamay. <sup>26</sup> Simpana megbolaw si Satanas diyà te menge sakop din aw meinang dan poon din, kebàtan se peglowan din te eked kenamay.

<sup>27</sup> “Aw magsen se otaw, eked keagaw se awop te balay din singed aw domateng se otaw labi pa magsen diyà kandin. Yan se mekedaeg te tig-apò te balay aw meglegapos kandin, aw penga niyan mengabat sikandin te awop te balay.

<sup>28</sup> “Eneng-enengi niyo se kagi ko kenyo. Pengkey eden kemoloi te salà inangen te otaw, mepakay iyan pegwedaden te Timanem, pengkey megkompuyus dan kandin. <sup>29</sup> Meneng aw megkompuyus se otaw te Espiritu Santo, eked palos pegwedadi se salà din siyan. Meneng ipelumun sikandin te wedad temanana tandà te salà din siyan.”

<sup>30</sup> Yan se inikagi din diyà kandan, so minikagi dan te dinetengan te bosaw si Jesus.

*Inay aw menge kedowa i Jesus*

*Mar. 3:31-35; Mat. 12:46-50; Luc. 8:19-21*

<sup>31</sup> Nayan, pegtoladà i Jesus, dimateng se inay din aw menge kedowa din. Migtagad dan doton te lowà te balay. Impetawal dan sikandin so ibeg dan megkità kandin. <sup>32</sup> Medita se otaw nenoo kidoen te dapag din, aw minikagi dan diyà kandin, “Doton te lowà se inay no aw menge kedowa nikaw. Meibeg dan ekon megkità kamno.”

<sup>33</sup> Meneng minikagi si Jesus diyà kandan, “Mikagi a den diyà kenyo aw sinu se inay ko aw menge kedowa ko.”

<sup>34</sup> Penga niyan, timengteng si Jesus diyà te menge otaw nenoo kidoen, aw minikagi sikandin, “Seini se inay ko aw menge kedowa ko. <sup>35</sup> Se menge otaw egtolò te ibeg te Timanem, yan se meinang inay ko aw menge kedowa ko meama aw bayi.”

## 4

*Tegdeyanan tepad te otaw nenabog te beni*

*Mar. 4:1-9; Mat. 13:1-9; Luc. 8:4-8*

<sup>1</sup> Nayan, doen aldaw migtoladà si Jesus doton te kilid te lanaw. Ontò medita se otaw netipon diyà kandin, aw yan se doun te minalin sikandin doton te belangay pinondohan medapag te kilid te lanaw. Nenenoo sikandin kidoen, meneng mig-ogpà se kedita te otaw tinoledaan din doton te kilid te lanaw kidoen te tanà. <sup>2</sup> Penga niyan, medita se kebenalan intoladà din diyà kandan

pineokit te tegdeyanan. Pegtoladà din, minikagi sikandin, <sup>3</sup> “Doen otaw dimoton te pawà amon menabog te benì, so yan se ketanem te pegpenanem din. <sup>4</sup> Pepsabog din, doen benì nesabog diyà te dalan, aw kinaen iyan te menge manok te kebenesan. <sup>5</sup> Doen heman benì nesabog diyà te tanà kebetto-betowan, aw wedad nael tanà ki-doen. Timobò iyan te wedà kenamay, so kenà medalem se tanà. <sup>6</sup> Meneng pegkelangkaw te aldaw, nelanes aw nematay so wedad nael dalid. <sup>7</sup> Doen heman benì nesabog diyà te pinonoan te sagbet doen tigus. Timilles heman se sagbet doen tigus aw kinelep se menge tobò aw nematay. Yan wedad palos pongo niyan. <sup>8</sup> Meneng doen benì nesabog diyà te melambò tanà. Yan se timobò aw timilles, aw minongo. Doen minongo te ketlowan, aw doen minongo te keneman aw ginatos.”

<sup>9</sup> Minikagi heman si Jesus, “Keilangan meneralan se kedita niyo doen telinga.”

### *Tod te menge tegdeyanan*

*Mar. 4:10-12; Mat. 13:10-17; Luc. 8:9-10*

<sup>10</sup> Penga te pegkesayo te keditaan te otaw, doen diyà te sempolò teg dowa tinoledaan i Jesus aw menge otaw nesamà mig-insà diyà kandin tepad te tegdeyanan intoladà din. <sup>11</sup> Minikagi si Jesus, “Sikiyo se pinetega-tegahan te Timanem te kebenalan tepad te peglowan din. Meneng olò pineokit te tegdeyanan se pegtoladà ko te doma otaw <sup>12</sup> amon pengkey tomengteng dan, meneng eked dan kità te kedegdagan niyan. Pengkey domineg dan, meneng eked dan ketaga-taga te

kebenalan niyan, so aw mekelabet dan, mengenganay dan diyà kanak aw pegwedaden ko se salà ininang dan.”

*Kedegdagan te tegdeyanan tepad te otaw nenabog*

*Mar. 4:13-20; Mat. 13:18-23; Luc. 8:11-15*

<sup>13</sup> Minikagi si Jesus, “Nepela a so wedà kaw pekelabet te tegdeyanan siyan. Aw wedà kaw pekelabet kenyan, eked kaw pekelabet te kedita te doma tegdeyanan ipegtoladà ko kenyo. <sup>14</sup> Nayan, se kedegdagan te otaw nenabog te benì, yan se otaw egtoladà te kagi te Timanem. <sup>15</sup> Se benì nesabog diyà te dalan, yan se iling te otaw toledaan te kagi te Timanem. Aw domineg dan kenyan, doen inangen i Satanas amon kelibelan dan se kagi te Timanem dinineg dan. <sup>16</sup> Nayan, se benì nesabog diyà te tanà kebetto-betowan, yan se iling te otaw domineg te kagi te Timanem, aw meluba dan, aw tomolò dan kenyan te eked kenamay. <sup>17</sup> Meneng aw domateng se kelimahan aw pemilangen dan tandà te pegpemenal dan te kagi te Timanem, tenanan dan se pinemenalan dan, so iling dan te tinanem wedad nael dalid. <sup>18</sup> Nayan, se benì nesabog diyà te pinonoan te sagbet doen tigus, yan se iling te otaw ontò domineg te kagi te Timanem intoladà. <sup>19</sup> Meneng penga niyan, wedad ontong dan so dàgen dan te ibeg dan tomaking te ketanem te keneyonan, aw ibeg dan megkeyaman amon meluba dan, aw menge doma ibeg dan. Yan se doun te wedad ontong dan diyà te kagi te Timanem dinineg dan. <sup>20</sup> Meneng se benì nesabog diyà te melambò tanà, yan se iling te otaw



domineg te kagi te Timanem, aw menenalan dan kenyan. Doen ontong dan iling te intanem mongo te ketlowan, aw keneman aw ginatos.”

*Tepad te solò isawol diyà te kelengkawan*

*Mar. 4:21-25; Mat. 5:15; 13:12; Luc. 8:16-18*

<sup>21</sup> Minikagi si Jesus, “Aw menemtem se otaw te solò, eked din iyan sengkobi. Eked din heman elesi doton te siyong te katri. Meneng mèpiya aw isawol din iyan diyà te kelengkawan. <sup>22</sup> Iling heman kenyan, wedad in-eles songkani eked kitai te modi aldaw. Wedad heman imbolon songkani eked keindan te modi aldaw. <sup>23</sup> Keilangan mene-nalan se kedita niyo doen telinga.”

<sup>24</sup> Minikagi heman si Jesus, “Keilangan toloen niyo se dinineg niyo. <sup>25</sup> Se otaw kominawà te kebenalan, yan se dogangan te kebenalan. Meneng se otaw eked kinawà te kebenalan, yan se peg-wedadan te kebenalan.”

*Tegdeyanan tepad te beni egtobò*

<sup>26</sup> Minikagi heman si Jesus, “Iling kani se peglowan te Timanem. Aw menanem se otaw te beni doton te pawà din, <sup>27</sup> penga niyan, wedad ketetana din tepad te pegtilles niyan pengkey aldaw aw delem, so gayed tomobò aw tomilles se itanem din pengkey wedà din ketegahi se pegtobò niyan. <sup>28</sup> Gayed tomilles se itanem kidoen te tanà, so onà tomobò, aw penga niyan domawen, aw penga niyan mongo iyan. <sup>29</sup> Aw metesan se pongo, geniyan iyan te otaw, so dimateng den se aldaw te peglegani.”

*Tegdeyanan tepad te benì ontò deitek*

*Mar. 4:30-34; Mat. 13:31-32,34; Luc. 13:18-19*

<sup>30</sup> Minikagi heman si Jesus, “Meg-indan a den kenyo tepad te peglowan te Timanem pineokit te tegdeyanan seini. <sup>31</sup> Doen benì ontò deitek intanem te otaw doton te pawà din. Pengkey wedad ekon palos benì labi pa deitek kenyan, <sup>32</sup> meneng penga te pegtanem din, timilles iyan, aw labi pa iyan dakel diyà te kedita te doma intanem din. Dakel se menge panga niyan, aw migsalag se menge manok kidoen.”

<sup>33</sup> Migtoladà si Jesus kandan pineokit te medita tegdeyanan iling kenyan taman te egkelebetan dan. <sup>34</sup> Impeokit din te tegdeyanan se kedita te intoladà din kandan. Meneng gayed din ipeg-indan te menge tinoledaan din dalem te wedad doma dan aw eden se kedegdagan te kedita te tegdeyanan.

*Impetunung i Jesus se kelamag*

*Mar. 4:35-41; Mat. 8:23-27; Luc. 8:22-25*

<sup>35</sup> Pegkeapon te aldaw siyan, minikagi si Jesus diyà te menge tinoledaan din, “Mèpiya aw matas kidon doton dipag te lanaw.”

<sup>36</sup> Penga niyan, tinenanan dan se kedita te otaw netipon kidoen te kilid te lanaw, aw simakay dan heman te belangay tapay sinekayan i Jesus. Doen heman menge doma belangay timaking kandan. <sup>37</sup> Wedà kenamay, dinetengan dan te kelamag ontò mebandes, aw nekeawop se wayeg diyà te belangay, aw agpet dan neteled. <sup>38</sup> Meneng neketedogi si Jesus diyà te olonan kidoen te

olin. Linoka dan sikandin aw minikagi dan, “Sir, tebangi kay, so melemes kidon den.”

<sup>39</sup> Neloka si Jesus aw sinagda din se kelamag. Minikagi sikandin diyà te balud, “Pegkelinaw ka.”

Penga niyan, timunung se kelamag aw migkelinaw se lanaw. <sup>40</sup> Minikagi si Jesus, “Wedà pa kedì kelobos se pegsalig niyo kanak. Ikà niyo egkelemitan.”

<sup>41</sup> Ontò dan nepela aw migpebelaw-belaway dan, kagi dan, “Ontò sikandin metolos, so pengkey kelamag aw balud timolò kandin.”

## 5

### *Pinegoli i Jesus se otaw dinetengan te bosaw*

*Mar. 5:1-20; Mat. 8:28-34; Luc. 8:26-39*

<sup>1</sup> Nayan, dimeleg dan doton dipag te lanaw medapag te Gerasa. <sup>2</sup> Pegtenà i Jesus, doen otaw dinetengan te bosaw simongon kandin lekat te menge lebenganan, <sup>3</sup> so yan se eg-ogpaan din. Ontò sikandin magsen, aw yan se doun te eked sikandin kegapos te doma otaw, pengkey doen sengkali. <sup>4</sup> Pengkey melikit dan sikandin eggeposen te sengkali, aw egpentongan dan sikandin, meneng gayed din egbogtoen se sengkali, aw egbàtan din se ipegpantong kandin. Wedad palos otaw mekedaeg kandin so ontò magsen. <sup>5</sup> Pengkey aldaw aw delem, gayed sikandin eglegeb kidoen te lebenganan aw doton heman te bontod, aw gayed egpuypuy aw egpemoneg te lawa din te bato.

<sup>6</sup> Pegkità din ki Jesus doton te mediyò, kimagnan sikandin simongon ki Jesus aw limongken diyà

kandin. <sup>7-8</sup> Migpunù si Jesus diyà te bosaw, kagi din, “Lowà ka den diyà kandin.”

Minikagi se otaw te dakel kagi din, “Jesus, Batà te Timanem ontò melangkaw, ikà egsamok kanak. So Timanem se egtengteng kenita, memoyò a diyà kamno, ikà bag egpeeleg kanak.”

<sup>9</sup> Mig-insà si Jesus, “Sinu lay se ngadan nikaw?”

Timaba sikandin, “Si Minelalan se ngadan ko, so medita kay.”

<sup>10</sup> Ontò nemoyò se bosaw diyà ki Jesus te eked din dan peseyowi doton te mediyò ogpeanan.

<sup>11</sup> Ontò medita se osa nenowal doton te bontod medapag. <sup>12</sup> Nemoyò se minge bosaw diyà ki Jesus, kagi dan, “Aw mepakay diyà kamno, malin kay doton te minge osa siyan.”

<sup>13</sup> Yan impealin din dan. Limowà se minge bosaw lekat te otaw aw minalin dan doton te osa. Penga niyan, kimagnan se kedita te osa pesalo te keba, aw kimahang dan doton te lanaw. Nelemes se kedita dan minge dowà melalan.

<sup>14</sup> Penga niyan, kimadas se minge telediyaga te osa aw mig-indan dan tepad kenyan doton te lonsod aw kedepagan niyan. Penga niyan, dimoton se minge otaw inindanan dan amon komità dan kenyan. <sup>15</sup> Pegdateng dan doton ki Jesus, kinità dan se otaw pinelowaan te minelalan se bosaw. Nenenoo sikandin, aw nenelowal den, aw migkèpiya den. Pegkità dan kenyan, nelemitan dan. <sup>16</sup> Inindanan dan heman te minge otaw kimità kenyan tepad te neinang diyà te otaw siyan aw minge osa. <sup>17</sup> Lekat niyan, nemoyò dan te mesayo si Jesus lekat te ogpeanan dan.

<sup>18</sup> Penga niyan, te pegsakay i Jesus te belangay, nemoyò se otaw pinelowaan te bosaw aw mepakay sikandin tomaking. <sup>19</sup> Meneng wedà din petekingi, so inikegiyan i Jesus, “Olì ka den doton te menge kedomaan nikaw, aw peg-indan ka kandan tepad te mèpiya ininang te Pengolo kamno, aw keido din kamno.”

<sup>20</sup> Penga niyan, nesayo sikandin aw mig-indan doton te Dikapolis tepad te mèpiya ininang i Jesus diyà kandin. Yan se doun te nepela se kedita te otaw inindanan din.

*Pinegoli se dowaya bayi*

*Mar. 5:21-43; Mat. 9:18-26; Luc. 8:40-56*

<sup>21</sup> Pegbatas i Jesus doton dipag te lanaw, ontò medita se otaw netipon diyà kandin doton te kilid te lanaw. <sup>22</sup> Penga niyan, dimoton ki Jesus se sebad obanen te simbahan te Judiyo, ngadan din si Jairo. Pegkità din ki Jesus, limongken sikandin <sup>23</sup> aw nemoyò, kagi din, “Ontò netigdaan se deitek batà ko bayi. Peg-ayas ka bag, aw pemàdi sikandin amon kegolian aw eked kematay.”

<sup>24</sup> Penga niyan, timaking si Jesus kandin. Ontò medita se doma otaw timaking ki Jesus aw migpe-segseg dan kidoen te dalan.

<sup>25</sup> Nayan, doen heman sebad bayi timaking kandin pigdipenogan te sempolò den teg dowaya se omay. <sup>26</sup> Medita se doktor migbolong kandin, aw neamin se kedakel te kwarta din. Ontò sikandin ineleg, so pengkey eden se imbolong dan kandin, meneng labi den beling medaet se mesakit din. <sup>27</sup> Pegdineg din tepad te eg-inangen i Jesus, dimoton sikandin aw migpedapag diyà te getan din

aw nemaed te saol din, <sup>28</sup> so tapay sikandin mig-aneng-aneng te megolì se mesakit din aw pemàdan din olò se saol i Jesus. <sup>29</sup> Pegketà, negolì se mesakit din, aw mig-imanman sikandin te mèpiya den se lawa din.

<sup>30</sup> Pegketaga-taga i Jesus te doen neinang pineokit te tolos din, miniling sikandin aw timengteng diyà te menge otaw timaking kandin, aw minikagi, “Sinu lay se nemaed te saol ko?”

<sup>31</sup> Minikagi se menge tinoledaan din, “Ikà eg-insà aw sinu se nemaed kamno, so pigdenganan ka te medita otaw.”

<sup>32</sup> Meneng gayed timengteng si Jesus diyà te kedita dan amon kitaen din aw sinu se nemaed kandin. <sup>33</sup> Nelemitan se bayi siyan, so netegahan din te negolì den se mesakit din. Yan migpedapag sikandin diyà ki Jesus aw tinegangtang tandà te lamit din. Limongken sikandin diyà ki Jesus aw mig-indan kandin te kedita tepad te mesakit din aw pegkegolì niyan. <sup>34</sup> Penga niyan, minikagi si Jesus, “Atà, simalig ka diyà kanak, aw yan se doun te negolian ka. Olì ka den. Mèpiya den se pedowan aw lawa nikaw.”

<sup>35</sup> Telobo pa minikagi si Jesus diyà te bayi, dimateng se otaw lekat te balay te obanen te simbahan, aw minikagi diyà ki Jairo, “Nematay den se batà nikaw. Wedad den kekemowan te pegpedeleg no te Menenoladà doton te balay nikaw.”

<sup>36</sup> Meneng wedà segmani i Jesus se inikagi dan. Minikagi sikandin diyà ki Jairo, “Ikà egkepuluk, meneng salig ka diyà kanak.”

<sup>37</sup> Wedad doma otaw impetaking i Jesus doton te balay, meneng olò si Pedro, aw si Santiago, aw adi

i Santiago si Juan. <sup>38</sup> Pegdateng dan doton te balay i Jairo, kinità i Jesus se menge otaw migbelisì, aw migkelag, aw migmatay tandà te lano dan. <sup>39</sup> Pegawop din diyà te balay, minikagi sikandin, “Ikà niyo egbelisì. Ikà niyo egkelag. Wedà kematay se batà. Olò sikandin timedogi.”

<sup>40</sup> Meneng nebebeyatan dan si Jesus. Penganian, impelowà din se kedita dan, aw dimoton sikandin te tambì inibatan te batà. Impetaking din olò se tinoledaan din aw amay aw inay te batà.

<sup>41</sup> Pinemàdan din se belad te batà, aw minikagi te kagi te Hebreo, “Talita kumi.” (Se kelebadan niyan, “Atà, enaw ka.”)

<sup>42</sup> Pegketà, minenaw sikandin aw migpanawpanaw, so sempolò den teg dowà se omay din. Ontò nepela se amay aw inay din. <sup>43</sup> Meneng ontò migpunù si Jesus te wedad palos otaw mepakay indanan dan tepad te peg-antay din te batà siyan. Minikagi heman si Jesus te mèpiya aw pemekànen dan se batà.

## 6

*Wedà segmani si Jesus kidoen te Nasarit*

*Mar. 6:1-6; Mat. 13:53-58; Luc. 4:16-30*

<sup>1</sup> Nayan, nesayo si Jesus aw minolì doton te kandin lonsod. Timaking heman se menge tinoledaan din. <sup>2</sup> Pegkesebado, migtoladà

sikandin doton te simbahan te Judiyo. Nepela se medita otaw dimineg kandin, aw minikagi dan, “Ontò kidon nepela so dakel den se nebatog din. Ontò sikandin biyasa, aw mèpiya heman se kepelahan eg-inangen din. <sup>3</sup> Meneng netegahan tadon te olò sikandin karpintiro, aw si Maria

se inay din. Netegahan tadon heman se menge kedowa din si Santiago, si Jose, si Judas, aw si Simon. Eg-ogpà heman se menge etebay din dini kenitadon.”

Yan nebensi dan ki Jesus. <sup>4</sup> Penga niyan, minik-agi sikandin, “Gayed egsegmanen te doma otaw se telekeliwat te kagi te Timanem, meneng kenà sikandin egsegmanen te menge otaw te kandin lonsod aw menge kedowa din.”

<sup>5-6</sup> Nepela si Jesus so wedà dan pemenal kandin, aw yan se doun te pilabok se kepelahan ininang din kidoen. Pilabok olò se otaw pinemàdan din aw negolian.

*Insogò se sempolò teg dowà tinoledaan i Jesus  
Mar. 6:6-13; Mat. 10:5-15; Luc. 9:1-6*

Nayan, miglegeb si Jesus doton te kedita te lonsod, aw migtoladà kidoen. <sup>7</sup> Doen sebad aldaw migtipon sikandin te sempolò teg dowà tinoledaan din. Imbegay din diyà kandan se tolos amon megpelowà dan te bosaw lekat te otaw, aw insogò din dan teg dowà-dowà doton te menge doma ogpeanan. <sup>8</sup> Te wedà dan pa kesayo, doen impunù din kandan te olò bangkà se mepakay dan ibingen. Eked dan pengibing te kànen, aw kelepì, aw kwarta, so togpoan dan te otaw toledaan dan. <sup>9</sup> Mepakay aw menepatos dan, meneng eked dan pengibing te ekasan. <sup>10</sup> Migpunù sikandin, kagi din, “Aw domateng kaw doton te lonsod, ketingen kaw diyà te sebad balay. Ikà niyo eg-alin-alin lamig domeleg kaw doton te doma lonsod. <sup>11</sup> Aw doen otaw eked pegsagman kenyo, aw eked dan penenalan te itoladà niyo, tektaki niyo se napò te



tanà lekat te sepatos niyo te pegkesayo niyo lekat te lonsod dan. Yan metaga-tagaga se otaw kidoen te doen salà ininang dan, so wedà dan penenalan kenyo.”

<sup>12</sup> Penga niyan, nesayo dan. Pengkey kenan dan pesalo, migtoladà dan te keilangan megselsel se kedita te otaw te salà ininang dan. <sup>13</sup> Medita se bosaw impelowà dan lekat te otaw, aw medita heman se otaw doen mesakit pinetedakan dan te lana aw negolian dan.

*Pegpengimatay ki Juan Memonyagay*

*Mar. 6:14-29; Mat. 14:1-12; Luc. 9:7-9*

<sup>14</sup> Nayan, dimineg se selotan si Herod tepad te ininang i Jesus aw menge tinoledaan din, so ontò nedengeg si Jesus. Doen menge otaw eg-ikagi, “Sikandin besi si Juan Memonyagay neantay den lekat te nematay, aw yan se doun te eg-inangen din se kepelahan metolos.”

<sup>15</sup> Meneng doen heman menge doma otaw eg-ikagi, “Sikandin se telekeliwat te kagi te Timanem gebii si Elias.”

Doen heman menge doma otaw eg-ikagi, “Ontò sikandin telekeliwat te kagi te Timanem, iling te menge telekeliwat te kagi te Timanem gebii.”

<sup>16</sup> Meneng pegdineg i Herod tepad te ininang i Jesus, minikagi sikandin, “Sikandin besi si Juan Memonyagay, siyan impesipal ko se lieg din, meneng neantay besi lekat te nematay.”

<sup>17</sup> Yan se inikagi i Herod, so kedengan impedakep din si Juan, aw impegapos din, aw impekelebosò din. Yan se ininang din ki Juan amon meluba se nayi din si Herodias inagaw

din diyà te kedowa din si Felipe. <sup>18</sup> Peg-agaw i Herod te nayi din, simila si Juan kandin, kagi din, “Mig-inang ka te salà, so nengagaw ka te nayi nikaw.”

<sup>19</sup> Yan se doun te neopal si Herodias diyà ki Juan, aw ibeg din ipeimatay din si Juan. Meneng wedà pekedeleg, <sup>20</sup> so egsagman si Herod ki Juan, so netegahan din te gayed eg-inang si Juan te metòlid, aw wedad salà ininang din. Yan se doun te eked kepakay diyà kandin aw imetayan si Juan. Egkeibeg si Herod domineg te ipegtoladà i Juan, meneng pegdineg din kenyan, ontò migkebulung se aneng-aneng din.

<sup>21</sup> Nayan, mig-inang si Herod te pista tepad te aldaw te pegtebaw din, aw impetanod din se kedita te opisyal, aw kapitan te sondalo, aw otaw meyaman. Yan se aldaw intelegsà i Herodias amon ipeimatay din si Juan. <sup>22</sup> Pegsayaw te laga batà i Herodias, ontò neluba si Herod aw menge otaw timanod. Penga niyan, minikagi si Herod, “Pemoyoi den se ibeg no diyà kanak pengkey eden, so ibegay ko iyan diyà kamno.”

<sup>23</sup> Migsapà si Herod diyà kandin, kagi din, “Pengkey eden se pemoyoen nikaw, yan se ibegay ko kamno, pengkey taman te ketengà te tanà eglowanan ko.”

<sup>24</sup> Penga niyan, nesayo se laga aw mig-insà diyà te inay din, kagi din, “Eden lay se mèpiya pemoyoen ko?”

Minikagi se inay din si Herodias, “Pemoyoi te ipesipal din se lieg i Juan Memonyagay.”

<sup>25</sup> Penga niyan, ayas limikò se laga doton ki Herod, aw nemoyò, kagi din, “Ibeg ko, ipesipal no

se lieg i Juan Memonyagay, aw ipesawol no se olo din diyà te dakel sablag, aw ipeibing no dini kanak te eked kenamay.”

<sup>26</sup> Ontò nelidò se pedowan i Herod. Meneng so migsapà sikandin, aw eked keibeg silahen te menge otaw timanod, eked sikandin tomalis te pakang din diyà te laga. <sup>27</sup> Yan se doun te wedà sikandin peg-alà-alà, aw insogò din se sondalo mangay te olo i Juan. Penga niyan, dimoton se sondalo te keleboso aw sinipal din se lieg i Juan. <sup>28</sup> Insawol din se olo din diyà te sablag, aw imbegay din diyà te laga, aw inibing te laga doton te inay din. <sup>29</sup> Pegdineg te menge tinoledaan i Juan te inimetayan sikandin, dimoton dan te keleboso, aw inabat dan se lawa din aw inlebang dan iyan.

*Impekaen i Jesus se lima melalan otaw*

*Mar. 6:30-44; Mat. 14:13-21; Luc. 9:10-17; Juan 6:1-14*

<sup>30</sup> Nayan, peg-oli te menge sogounun i Cristo doton kandin, mig-indan dan diyà kandin tepad te kedita te ininang dan aw intoladà dan. <sup>31</sup> Penga niyan, minikagi si Jesus, “Tenani niyo se doma otaw, aw taking kaw kanak doton te kesikmihan amon meg-etod kaw te eked kenamay.”

Yan se inikagi din, so medita se otaw gayed egdoton kandin, aw kenà egpekekaen si Jesus aw menge tinoledaan din. <sup>32</sup> Penga niyan, nesayo dan lekat kidoen. Simakay dan te belangay aw dimoton dan te kesikmihan te wedad doma dan.

<sup>33</sup> Nayan, medita se otaw kimità te pegkesayo dan, aw netegahan dan te sikandan si Jesus aw menge tinoledaan din. Yan nesayo dan lekat te medita ogpeanan dan, aw kimagnan dan diyà

te kilid te lanaw, aw nekeonà dan dimateng doton te peselowan te belangay sinekayan i Jesus. <sup>34</sup> Pegtenà i Jesus, kinità din se ontò medita otaw migtagad kandin. Ontò din dan neidowan, so iling dan te menge ayam-ayam karniro megketading te eked kenamay aw wedad megdiyaga kandan. Penga niyan, migtoladà si Jesus kandan te medita kebenalan. <sup>35</sup> Pegkeapon niyan, dimoton se tinoledaan din kandin, aw minikagi dan, “Ontò ini kebigtilan, aw agpet den delem. <sup>36</sup> Pekeseyowi se kedita te otaw doton te menge lonsod aw kedepagan amon mayad dan te kànen.”

<sup>37</sup> Meneng minikagi si Jesus, “Pemekàni niyo dan.”

Minikagi dan diyà kandin, “Eked day kebatog. Simpana mayad kay te pan botong te ipekaen day kandan, keilangan dakel se kwarta ibayad day kenyan, menge dowagatos kwarta dinaryo.”

<sup>38</sup> Minikagi si Jesus, “Tengtengi niyo aw pila se pan inibing niyo.”

Pegkità dan, limikò dan doton ki Jesus aw minikagi dan, “Lima olò se pan, aw didowa se ikan.”

<sup>39</sup> Penga niyan, impeebong-ebong i Jesus se kedita te otaw aw impeonsad din dan kidoen te sagbet. <sup>40</sup> Peg-onsad dan, doen menge inebongan teg sebad gatos otaw, aw doen heman menge inebongan teg keliman otaw. <sup>41</sup> Penga niyan, inabat i Jesus se lima pan aw didowa ikan. Limengag sikandin doton te langit aw migpesiontong diyà te Timanem kenyan. Penga niyan, binelà-belà din se pan aw imbegay din diyà te menge tinoledaan din amon iteped dan diyà te menge

otaw netipon. Impeteped din heman se didowa ikan diyà te kedita te otaw. <sup>42</sup> Kimaen se kedita dan aw nebesog dan. <sup>43</sup> Penga niyan, inimon dan se samà te pan aw ikan kinaen dan, aw sempolò teg dowà se buun nepenò. <sup>44</sup> Menge lima melalan se meama kimaen te pan, aw doen heman menge bayi aw mengisù.

*Minipanaw si Jesus diyà te lanto te lanaw*  
*Mar. 6:45-52; Mat. 14:22-33; Juan 6:15-21*

<sup>45</sup> Penga niyan, impeonà i Jesus se menge tinoledaan din simakay te belangay pesalo doton dipag te lanaw, doton te Bitsayda. Dalem niyan, impeoli din se kedita te otaw netipon. <sup>46</sup> Pegkesayo dan, timikedeg si Jesus doton te bontod amon megtawal-tawal. <sup>47</sup> Pegsallep te aldaw, mediyò den se belangay doton te lawod te lanaw. Meneng si Jesus kidoen pa te bontod olò din sebad. <sup>48</sup> Kinità din te ontò melima se pegbugsay dan, so simongsong dan te kelamag. Ontò mata-mata te iselem, dimoton si Jesus kandan aw minipanaw sikandin diyà te lanto te lanaw. Ibeg din mekesaeb kandan. <sup>49</sup> Meneng pegkità dan kandin, eden dan aw along sikandin, so minipanaw sikandin diyà te lanto te lanaw. Migpuypuy dan, <sup>50</sup> so kimità se kedita dan kandin, aw ontò dan nelemitan. Meneng pegketà timawal si Jesus, kagi din, “Peseligi niyo se pedowan niyo, so siaken ini. Ikà niyo egkelemitan.”

<sup>51</sup> Penga niyan, eleg simakay si Jesus te belangay, aw timunung se kelamag. Ontò dan nepela, <sup>52</sup> so pengkey kinità dan se kepelahan ininang i

Jesus diyà te pan aw ikan, meneng wedà dan pa ketegahi te doen tolos din, so magsen se olo dan.

*Pinegolì i Jesus se menge otaw doton te Genesarit*

*Mar. 6:53-56; Mat. 14:34-36*

<sup>53</sup> Nayan, penga te pegbatas dan te lanaw, dimateng dan doton te Genesarit, aw migpondo dan kidoen. <sup>54</sup> Pegtenà dan, kimilala se menge otaw ki Jesus, <sup>55</sup> aw ayas dan inangay se kedita te otaw doen mesakit lekat te kedepagan niyan. Tingga dan se otaw aw dimoton dan te pengkey kenan ekon si Jesus. <sup>56</sup> Pengkey doton te lonsod aw mediyò te lonsod, pengkey kenan pesalo si Jesus, inibing dan se otaw doen mesakit doton te pedyanan, aw nemoyò dan diyà ki Jesus aw mepakay dan olò memaed te toktok te saol din, aw negolian se kedita dan nemaed kenyan.

## 7

*Ketanem te menge kemonaan*

*Mar. 7:1-13; Mat. 15:1-9*

<sup>1</sup> Nayan, doen menge Parisiyo aw menenoladà te punù ingkeliwat i Moises dimoton ki Jesus lekat te Jerusalem. <sup>2</sup> Kinità dan te limàpang se menge tinoledaan i Jesus te ketanem te menge Parisiyo, so kimaen dan te wedà dan peg-onaw te belad dan. <sup>3</sup> Doen ketanem te Parisiyo aw kedita te doma dan Judiyo te eked dan kaen singed aw onà dan onawan se belad dan iling te ketanem intoladà te kemonaan dan kandan. <sup>4</sup> Aw moli dan lekat te pedyanan, linisan dan se lawa dan te eked dan pa kaen. Medita heman se doma ketanem

egtekingan dan tepad te pegligaw te baso, aw keldiro, aw telepagan ininang te kinis, aw katri. <sup>5</sup> Minikagi se menge Parisiyo aw menenoladà te punù ingkeliwat i Moises, “Kenà egtaking se menge tinoledaan no te ketanem te kemonaan tadon, so kimaen dan te wedà dan peg-onaw te belad dan.”

<sup>6</sup> Minikagi si Jesus, “Eden niyo aw egpenimanem kaw. Sikiyo se tinedoan te kagi te Timanem ingkeliwat i Isaias gebii,

‘Pengkey eg-ikagi se otaw siyan te egtaking dan kanak, meneng wedà kelobos se pedowan dan kanak. <sup>7</sup> Wedad ontong te pegsimba dan kanak, so se ketanem te otaw ipeg-toladà dan, yan se ininang dan punù te Timanem.’

<sup>8</sup> Limengà kaw den te pegtolò niyo te punù te Timanem, aw gayed kaw egtaking te ketanem te otaw.”

<sup>9</sup> Minikagi heman si Jesus diyà kandan, “Ontò kaw biyasa egtinàyog te punù te Timanem amon gayed kaw tomaking te ketanem niyo. <sup>10</sup> Migpunù si Moises, ‘Keilangan segmanen no se amay aw inay nikaw.’ Migpunù heman sikandin, ‘Keilangan imetayan se otaw megtindaet te amay aw inay din.’ <sup>11</sup> Meneng egtoladà kaw te mepakay aw eked pegsagman se otaw te amay aw inay din aw olò mikagi diyà kandan, ‘Se itabang ko peden kenyo, yan se ininang ko corban, so imbegay ko den iyan diyà te Timanem.’ <sup>12</sup> Yan segdahen niyo se pegtabang din te amay aw inay din. <sup>13</sup> Pineokit te pegtaking niyo te menge ketanem egkeliwaten

niyo, timinàyog kaw te kagi te Timanem te keilangan segmanen niyo se amay aw inay niyo. Medaet heman se menge doma eg-inangen niyo.”

*Kelekatan te salà*

*Mar. 7:14-23; Mat. 15:10-20*

<sup>14</sup> Nayan, medita se otaw netipon kidoen, aw timawal si Jesus diyà kandan amon megpedapag dan diyà kandin. Minikagi sikandin, “Penenalan kaw kanak se kedita niyo amon mekelabet kaw kani. <sup>15</sup> Kenà egpekesalà se otaw pineokit te iawop din diyà te bahà din. Meneng egpekesalà se otaw pineokit te lomowà lekat te bahà din. [ <sup>16</sup> Keilangan menenalan se kedita niyo doen telinga.]”

<sup>17</sup> Penga niyan, nesayo si Jesus lekat kidoen te otaw netipon, aw minawop diyà te balay. Timaking se menge tinoledaan din aw mig-insà dan kandin tepad te tegdeyanan siyan. <sup>18</sup> Minikagi si Jesus, “Nepela a so iling kaw heman te doma otaw wedà pekelabet. Pengkey eden se kànen iawop diyà te bahà te otaw, kenà egpekesalà se otaw pineokit kenyan. <sup>19</sup> Eked deleg se kànen doton te pedowan din, meneng domeleg iyan doton te getek, aw penga niyan lomowà lekat te lawa.”

Pineokit te siyan kagi i Jesus, netegahan tadon den te mepakay aw komaen kidon te pengkey eden kemoloi te kànen.

<sup>20</sup> Minikagi heman si Jesus, “Meneng se kagi lomowà lekat te bahà te otaw, yan se doun te egpekesalà se otaw. <sup>21</sup> Didalem te pedowan se kelekatan te medaet ibeg te otaw eglayok



te kenà kandan esawa, aw egpenakaw, aw egbonò, aw eglakad, <sup>22</sup> aw egkeibeg te kedònan te doma, aw eg-inang te medaet, aw eg-akal, aw wedad yàyà metibayi, aw eg-ingà, aw egbaet-baet, aw egpelangkaw-langkaw, aw wedad inenengen. <sup>23</sup> Lekat didalem te pedowan se kedita te medaet sìyan, aw egpekesalà se otaw eg-inang kenyan.”

*Pegsalig te bayi kenà Judiyo*

*Mar. 7:24-30; Mat. 15:21-28*

<sup>24</sup> Timindeg si Jesus aw nesayo lekat kidoen, aw dimoton te probinsya medapag te lonsod te Tiro aw Sidon. Pegdateng din doton, migogpà sikandin diyà te balay kidoen. Pengkey ibeg din wedad metaga-taga aw kenan sikandin, meneng wedà sikandin pekeeles. <sup>25</sup> Doen batà bayi dinetengan te bosaw, aw dinineg te inay din te dimateng si Jesus. Yan dimoton se inay te batà sìyan aw limongken diyà kandin. <sup>26</sup> Kenà sikandin Judiyo, so eg-ikagi te Griego aw timebaw doton te Fenisya sakop te probinsya te Sirya. Nemoyò sikandin te ipelowà i Jesus se bosaw lekat te batà din. <sup>27</sup> Meneng mig-indan si Jesus te tegdeyanan amon metaga-taga se bayi te olò menge Judiyo se tebangan din, kagi din, “Keilangan onà ipekaen te otaw se menge batà din, so eked kepakay aw ebaten din se kànen te menge batà din amon ibegay din diyà te menge toyang.”

<sup>28</sup> Minikagi se bayi, “Sir, benal iyan. Meneng mepakay aw komaen se toyang te momò medagdag lekat te kinaen te menge batà.”

<sup>29</sup> Minikagi si Jesus, “Tandà te inikagi no sìyan, mepakay aw molì ka den, so limowà den se bosaw lekat te batà nikaw.”

<sup>30</sup> Peg-olì te bayi sìyan, kinità din se batà din minibat, aw wedad den bosaw diyà kandin.

### *Pinegolì i Jesus se otaw bingelen*

<sup>31</sup> Nayan, nesayo si Jesus lekat te lonsod te Tiro, aw minokit doton te lonsod te Sidon aw kedepagan te Dikapolis lamig dimateng doton te lanaw te Galiliya. <sup>32</sup> Pegdateng din doton, doen otaw inibing doton kandin bingelen aw kenà egkelitok se kagi din. Nemoyò se menge doma din te pemàdan i Jesus amon kegolian. <sup>33</sup> Penga niyan, inibing sikandin i Jesus doton te keligbinan, aw inloglog din se intetodò din diyà te telinga te otaw bingelen, aw inelem din se intetodò din te ngingi aw pinemàdan din se dilà te otaw sìyan. <sup>34</sup> Penga niyan, limengag sikandin doton te langit aw migpedo-pedo tandà te keido din, aw minikagi, “Efata.” (Se kelebadan niyan, “Keowang ka den.”)

<sup>35</sup> Pegketà, nekedineg se otaw sìyan, aw migkèpiya se dilà din aw nelitok se kagi din. <sup>36</sup> Penga niyan, migpunù si Jesus te keilangan eked dan indani diyà te doma otaw tepad te kepelahan sìyan. Pengkey ontò sikandin migpunù, meneng labi dan pa mig-indan kenyan diyà te doma otaw. <sup>37</sup> Ontò dan nepela, aw minikagi dan, “Ontò mèpiya se kedita te ininang din, so pengkey bingelen impedineg din, aw omo impeikagi din.”

## 8

*Impekaen i Jesus se epat melalan otaw  
Mar. 8:1-10; Mat. 15:32-39*

<sup>1</sup> Nayan, wedà kenamay, ontò medita se otaw netipon diyà ki Jesus. Pegkewedad te kànen dan, tinawal i Jesus se menge tinoledaan din, aw minikagi sikandin, <sup>2</sup> “Neidowan ko den se menge otaw seini, so netelowan den dan timaking kanak, aw wedad den kànen dan. <sup>3</sup> Simpana ipeolì ko dan te binallos dan pa, metapì dan kidoen te dalan, so mediyò se ogpeanan te keditaan dan.”

<sup>4</sup> Minikagi se tinoledaan din, “Meneng kebigtulan ini, aw wedad palos ebatan tadon te pan amon ipekaen tadon kandan.”

<sup>5</sup> Mig-insà si Jesus, “Pila lay se pan inibing niyo?” Timaba dan, “Pito olò.”

<sup>6</sup> Penga niyan, impeonsad din se kedita te otaw diyà te tanà. Inabat din se pito pan, aw migpesiontong diyà te Timanem kenyan. Binelà-belà din iyan, aw imbegay din diyà te menge tinoledaan din, aw inteped dan diyà te menge otaw netipon. <sup>7</sup> Doen heman pilabok ikan dedeitek. Migpesiontong heman si Jesus diyà te Timanem kenyan, aw impeteped din heman iyan diyà kandan. <sup>8</sup> Kimaen se kedita dan aw nebesog dan. Penga niyan, inimon dan se samà te pan kinaen dan, aw pito se bolyas nepenò. <sup>9</sup> Menge epat melalan se otaw kimaen kenyan. <sup>10</sup> Penga niyan, impeoli i Jesus se kedita dan, aw simakay sikandin te belangay doma te menge tinoledaan din, aw dimoton dan te probinsya medapag te Dalmanota.

*Ibeg dan komità te pengilala*

*Mar. 8:11-13; Mat. 16:1-4*

<sup>11</sup> Nayan, doen minge Parisiyo dimoton ki Jesus. Megdindil dan peden kandin. Ibeg dan megtandà dan kandin, aw yan se doun te nemoyò dan te ipekità din diyà kandan se pengilala amon kete-gahan dan te ontò sikandin insogò te Timanem.

<sup>12</sup> Ontò migpedo-pedo si Jesus tandà te puluk din, aw minikagi sikandin, “Wedad kekemowan te pegpekità ko kenyo te pengilala. Eneng-enengi niyo se kagi ko seini. Wedad palos pengilala ipekità te Timanem diyà kenyo.”

<sup>13</sup> Penga niyan, nesayo si Jesus lekat kidoen, aw simakay te belangay pesalo doton dipag te lanaw.

*Kolang se eg-inangen te minge Parisiyo aw si Herod*

*Mar. 8:14-21; Mat. 16:5-12*

<sup>14</sup> Nayan, pegbatas dan te lanaw, wedad pan inibing te minge tinoledaan i Jesus, so nelibelan dan se bawo dan. Meneng doen sebad olò pan kidoen te belangay. <sup>15</sup> Migpunù si Jesus kandan, kagi din, “Peg-ahà kaw amon eked kaw ketini te yist te minge Parisiyo aw si Herod.”

<sup>16</sup> Migpebelaw-belaway se minge tinoledaan din, kagi dan, “Yan se inikagi din so wedad pan inibing tadon.”

<sup>17</sup> Meneng netegahan i Jesus aw eden se aneng-aneng dan, aw minikagi sikandin, “Tay law. Ikà niyo egkepela so wedad pan inibing niyo. Nepela a kenyo, so wedà niyo pa kelebete se inikagi ko gina diyà kenyo. Magsen pa se olo niyo.

<sup>18</sup> Pengkey doen mata niyo, wedà kaw pa kità te

kebenalan. Pengkey doen telinga niyo, wedà kaw pa penenalan. Iling te nelibelan niyo se kepelahan ininang ko. <sup>19</sup> Pegpekaen ko te lima melalan otaw te lima pan, pila lay buun se inipenò niyo te samà?”

Timaba dan, “Sempolò teg dowà.”

<sup>20</sup> Mig-insà heman si Jesus, “Pegpekaen ko te epat melalan otaw te pito pan, pila lay boliyas se inipenò niyo te samà?”

Timaba dan, “Pito.”

<sup>21</sup> Minikagi si Jesus, “Aw wedà niyo iyan kelibeli, nepela a so wedà niyo pa keleteti se inikagi ko gina diyà kenyo.”

### *Pinegolì i Jesus se otaw bota*

<sup>22</sup> Nayan, dimoton si Jesus aw minge tinoledaan din te Bitsayda. Doen minge otaw nengibing te otaw bota doton ki Jesus, aw nemoyò dan te pemàdan din sikandin amon kegolian. <sup>23</sup> Minawid si Jesus te belad te otaw bota, aw inagak din doton te lowà te lonsod. Penga niyan, migsawol sikandin te ngingi diyà te mata te bota, aw nemaed kandin, aw mig-insà, “Doen lay den kinità nikaw?”

<sup>24</sup> Timengteng se otaw aw minikagi, “Ee. Meneng kenà metaen so iling te lawa te kayo se bawa te otaw kinità ko migpanaw-panaw.”

<sup>25</sup> Todà nemaed si Jesus te mata din. Penga niyan, ontò timengteng se otaw siyan aw kinità din se otaw ontò metaen, so migkèpiya den se mata din. <sup>26</sup> Penga niyan, impeoli sikandin i Jesus, kagi din, “Ikà eg-apit pengkey doton te lonsod.”

*Minikagi si Pedro te si Jesus se Misiyas*

*Mar. 8:27-30; Mat. 16:13-20; Luc. 9:18-21*

<sup>27</sup> Nayan, dimeleg si Jesus aw menge tinoledaan din pesalo doton te lonsod te Sesarya Filipos. Peg-ipanaw dan, mig-insà si Jesus diyà kandan, kagi din, “Eden lay se kagi te kedita te otaw tepad kanak? Sinu a lay ekon?”

<sup>28</sup> Timaba dan, “Doen menge otaw eg-ikagi te sikona si Juan Memonyagay. Doen heman eg-ikagi te sikona si Elias. Doen heman eg-ikagi te sikona se doma telekeliwat te kagi te Timanem gebii.”

<sup>29</sup> Mig-insà si Jesus, “Meneng eden lay se kenyo aneng-aneng tepad kanak? Sinu a lay?”

Timaba si Pedro, kagi din, “Sikona se Misiyas insogò te Timanem dini kenami.”

<sup>30</sup> Penga niyan, migpunù si Jesus te keilangan eked dan indani diyà te doma otaw tepad kandin.

*Minikagi si Jesus tepad te kemetayun din*

*Mar. 8:31–9:1; Mat. 16:21-28; Luc. 9:22-27*

<sup>31</sup> Nayan, migtoladà si Jesus diyà te menge tinoledaan din aw eden se metoman domateng diyà kandin Timanem Migpekeotaw. Ontò sikandin elegen, aw kuluwan sikandin te menge obanen te Judiyo aw menge pengolo te simbahan aw menenoladà te punù ingkeliwat i Moises. Metoman sikandin imetayan, meneng penga niyan te telo se aldaw, meantay sikandin lekat te nematay. <sup>32</sup> Ontò nebangal se intoladà din kandan. Penga niyan, migpedapag si Pedro diyà ki Jesus, aw minikagi diyà kandin te eked kepakay aw metoman iyan domateng diyà

kandin. <sup>33</sup> Meneng timengteng si Jesus diyà te menge tinoledaan din aw ontò minikagi diyà ki Pedro, kagi din, “Kesayo ka lekat kanak. Iling ka ki Satanas, so kenà lekat te Timanem se ibeg no siyan, meneng lekat iyan te aneng-aneng nikaw.”

<sup>34</sup> Penga niyan, tinawal i Jesus se menge tinoledaan din sipat kedita te doma otaw netipon kidoen. Minikagi sikandin, “Aw meibeg se otaw tomaking kanak, keilangan megsagda sikandin te ibeg te pedowan din, aw tomayod te kelimahan te kelikit te aldaw pengkey imetayan sikandin, aw keilangan ontò tomaking kanak. <sup>35</sup> Pengkey ibeg te otaw megkelayat se omol din dini te keneyonan, meneng kunù din gayed matay. Meneng aw mepakay diyà te otaw pengkey imetayan sikandin tandà te pegtaking din kanak aw pegtoladà din te Mèpiya Indan tepad kanak, begayan sikandin te kaling pedowan wedad teman. <sup>36</sup> So simpana tig-epoen te otaw se kedakel te keneyonan, aw penga niyan matay sikandin aw ipelumun doton te kilot, wedad ontong din, <sup>37</sup> so eked kebeyadi se kaling pedowan wedad teman. <sup>38</sup> Aw eked ikagi se otaw te sikandin se sakop ko, aw eked heman tolò te kagi ko meneng tomaking te otaw nelegeb te salà egtinàyog te Timanem, yan se otaw eked ko heman ikegihi te sikandin se sakop ko te peglikò ko. Siak se Timanem Migpekeotaw, aw lomikò a pa dini tekingan te kelangkaw te Amay ko aw sipat menge anghil te Timanem.”

## 9

<sup>1</sup> Minikagi heman si Jesus, “Eneng-enengi niyo se kagi ko kenyo seini. Doen otaw dini kenyo eked

kematay singed aw onà dan komità te pegtebò te peglowan te Timanem metolos.”

*Pegketodà te bawa i Jesus*

*Mar. 9:2-13; Mat. 17:1-13; Luc. 9:28-36*

<sup>2</sup> Nayan, pegkeokit te enem se aldaw, impetak-  
ing i Jesus si Pedro, si Santiago, aw si Juan, aw  
timikedeg dan doton te melangkaw bontod te  
wedad doma dan. Pegketà, dalem te pegtengteng  
dan diyà ki Jesus, netodà se bawa din. <sup>3</sup> Ontò  
migkepoti se kedakel te penenaktun din so ontò  
minanyag. Eked keinang iling kenyan se pene-  
naktun bugsakan dini te tanà, so ontò mepoti.  
<sup>4</sup> Penga niyan, kinità dan heman si Elias aw si  
Moises migbalaw-balaw doma ki Jesus. <sup>5</sup> Minikagi  
si Pedro diyà ki Jesus, “Pengolo, mèpiya so dini kay.  
Ibeg day meg-inang kay den te telo balay amon  
doen ogpaan te teg sebad-sebad kenyo si Moises  
aw si Elias.”

<sup>6</sup> Pengkey yan se inikagi i Pedro, meneng wedà  
din kelebeti aw eden se inikagi din, so ontò dan  
nelemitan. <sup>7</sup> Penga niyan, doen labon dimateng  
diyà kandan, aw wedà dan ebey kità kandan.  
Penga niyan, dinineg dan se kagi te Timanem  
lekat te labon, “Seini se Batà ko aw ontò dakel  
se pedowan ko kandin. Keilangan sikandin se  
penenelanan niyo.”

<sup>8</sup> Wedà kenamay, timengteng dan aw kinità dan  
olò si Jesus wedad den doma din.

<sup>9</sup> Pegtopang dan lekat te bontod, ontò migpunù  
si Jesus diyà kandan te eked kepakay aw indanan  
dan se doma otaw tepad te kinità dan singed aw  
meantay sikandin Timanem Migpekeotaw lekat te



nematay. <sup>10</sup>Timolò dan te punù din sìyan. Meneng gayed dan migpeinsaay aw eden se kedegdagan te inikagi din tepad te pegkeantay din lekat te nematay.

<sup>11</sup>Penga niyan, mig-insà dan diyà kandin, “Aw agpet ka den lomowan, nengà lay egtoladà se menge menenoladà te punù ingkeliwat i Moises te keilangan domateng si Elias te eked pa lowan se Misiyas?”

<sup>12</sup>Timaba si Jesus, “Benal domateng onà si Elias amon megpeketagad te kedita. Meneng eneng-enengi niyo heman te doen kagi te Timanem insolat tepad kanak Timanem Migpekeotaw te ontò a elegen aw kebebeyatan a. <sup>13</sup>Meneng mikagi a den diyà kenyo te dimateng den si Elias, aw medaet se ininang te doma otaw diyà kandin, aw yan se pegketoman te pakang insolat tepad kandin.”

*Pinegolì i Jesus se batà meama dinetengan te bosaw*

*Mar. 9:14-29; Mat. 17:14-21; Luc. 9:37-43*

<sup>14</sup>Pegdateng dan doton te menge doma tinoledaan i Jesus, kinità dan te ontò medita se otaw netipon diyà kandan, aw doen menge menenoladà te punù ingkeliwat i Moises migbalaw-balaw kandan. <sup>15</sup>Pegkità te kedita te otaw ki Jesus, ontò dan nepela, aw kimagnan dan aw simongon dan kandin. <sup>16</sup>Mig-insà si Jesus, kagi din, “Eden lay se imbalaw-balaw niyo kandan?”

<sup>17</sup>Timaba se sebad otaw, “Sir, inibing ko se batà ko amon megtabang ka kandin, so egdetengan sikandin te bosaw migpeomo kandin. <sup>18</sup>Aw egdateng iyan kandin, egpekeliyas, aw egbohak se

bahà din, aw egyangget-yangget se ngipen, aw egkeseg se lawa din. Nemoyò a diyà te menge tinoledaan no te ipelowà dan se bosaw lekat kandin, meneng wedà dan iyan kebatog.”

<sup>19</sup> Minikagi si Jesus, “Tay law, sikiyo menge otaw. Wedà kaw pa salig kanak. Eked den kenamay se pegdoma ko kenyo, meneng keilangan tomayod a pa pengkey eked kaw pemenal. Na, pedinihi se batà nikaw.”

<sup>20</sup> Penga niyan, inibing dan se batà. Meneng pegkità te bosaw ki Jesus, impekeseg te bosaw se batà, aw impelias aw impebolaling sikandin, aw migbohak se bahà din. <sup>21</sup> Mig-insà si Jesus diyà te amay din, “Kano lay ini pegtebò?”

Timaba se amay din, “Lekat pa te deitek sikandin. <sup>22</sup> Melikit sikandin eg-elosen te bosaw diyà te apoy, aw eglemesen heman diyà te wayeg amon imetayan sikandin. Meneng aw mebatog nikaw, keidowi kay bag aw tebangi kay.”

<sup>23</sup> Minikagi si Jesus, “Nepela a so egdowa-dowa ka te mebatog ko. Wedad palos eked kebatog te Timanem megtabang te otaw somalig diyà kandin.”

<sup>24</sup> Minikagi se otaw te dakel se kagi din, “Simalig a den diyà te Timanem. Lobosi se pegsalig ko diyà kandin amon eked a pegdowa-dowa.”

<sup>25</sup> Pegkità i Jesus te labi pa medita se otaw netipon, sinagda din se bosaw, kagi din, “Sikona bosaw migpeomo aw migpebingel kandin, lowà ka den lekat kandin, aw ikà palos eglikò diyà kandin.”

<sup>26</sup> Penga niyan, migpuypuy se bosaw, aw ontò din impekeseg se batà, aw penga niyan limowà.

Iling te wedad pedowan te batà, aw minikagi se keditaan te otaw, “Nematay den sikandin.”

<sup>27</sup> Meneng inewidan i Jesus se belad din aw impeenaw din, aw yan neketindeg.

<sup>28</sup> Peg-olì i Jesus aw menge tinoledaan din, dimoton dan kandin te wedad doma dan, aw mig-insà dan, “Nengà lay wedà day kebatog se peg-pelowà te bosaw lekat kandin?”

<sup>29</sup> Minikagi si Jesus, “Wedà niyo iyan kebatog so eked pelowai se kemolò te bosaw seini singed aw megtawal-tawal kaw.”

*Todà minikagi si Jesus tepad te kemetayun din  
Mar. 9:30-32; Mat. 17:22-23; Luc. 9:43-45*

<sup>30</sup> Nayan, nesayo si Jesus aw menge tinoledaan din lekat kidoen, aw minokit dan te probinsya te Galiliya. Meneng ibeg i Jesus, wedad metagataga aw kenan sikandin, <sup>31</sup> amon eked keanggà se pegtoladà din te menge tinoledaan din. Minikagi sikandin, “Seini se metoman domateng diyà kanak Timanem Migpekeotaw. Metoman a itolok aw ibegay a diyà te belad te doma otaw. Penga niyan, imetayan a dan, meneng penga te telo se aldaw, meantay a lekat te nematay.”

<sup>32</sup> Meneng wedà dan ketegahi aw eden se kedegdagan te inikagi din siyan, meneng wedad mig-insà kandin tepad kenyan, so neyàya dan.

*Sinu lay se ontò melangkaw?*

*Mar. 9:33-37; Mat. 18:1-5; Luc. 9:46-48*

<sup>33</sup> Nayan, pegdateng i Jesus aw menge tinoledaan din doton te Kapirnaom, mig-ogpà dan diyà te balay. Mig-insà si Jesus, “Eden lay se

pidindilan niyo gina kidoen te dalan te wedà kidon pa dateng dini?”

<sup>34</sup> Meneng wedad timaba, so migpedindilay dan aw sinu se ontò melangkaw diyà kandan. <sup>35</sup> Penga niyan, nenenuo si Jesus aw tinawal din se kedita te sempolò teg dowa dan, aw minikagi sikandin, “Aw meibeg se otaw megkelangkaw, keilangan megpedanà sikandin te pegkeotawun din iling te kedanà te allang.”

<sup>36</sup> Penga niyan, tinawal i Jesus se sebad batà, aw impetindeg din iyan kidoen te tengà-tengà dan. Penga niyan, inolid din, aw minikagi sikandin, <sup>37</sup> “Aw megsagman se otaw te sakop ko iling te kedanà te sebad batà seini tandà te pegpesakop din kanak, pineokit kenyan segmanen a din heman. Aw megsagman se otaw kanak, kenà olò siaken se segmanen din, so segmanen din heman se Amay ko simogò kanak.”

*Meinang doma tadon se otaw kenà poon tadon  
Mar. 9:38-41; Luc. 9:49-50*

<sup>38</sup> Nayan, minikagi si Juan diyà ki Jesus, “Sir, doen otaw kinità day migpelowà te bosaw lekat te menge otaw pineokit te ngadan nikaw. Meneng sinagda day sikandin so wedà pekeakop diyà kenitadon.”

<sup>39</sup> Meneng minikagi si Jesus, “Ikà niyo egsagda kandin, so aw meg-inang se otaw te kepelahan pineokit te ngadan ko, eked tagmon ikagi te medaet tepad kanak. <sup>40</sup> Se otaw kenà poon tadon, meinang sikandin doma tadon. <sup>41</sup> Eneng-enengi niyo se kagi ko kenyo seini. Aw melao kaw, aw doen otaw memegay kenyo te wayeg tandà te

pegpesakop niyo diyà kanak, begayan sikandin te Timanem te ontong.”

*Pegboyo amon mekesalà*

*Mar. 9:42-50; Mat. 18:6-9; Luc. 17:1-2*

<sup>42</sup> Minikagi heman si Jesus, “Aw doen otaw mekebaet te pegpemenal te mengisù egkeidowan ko, ontò medaet se pelumun domateng diyà kandin. Labi pa mèpiya aw iketan se lieg din te dakel bato aw idagdag doton te lawod. <sup>43-44</sup> Aw meboyo kaw meg-inang te salà pineokit te belad niyo, mèpiya aw tokongen niyo se belad niyo amon eked kaw peg-inang te salà, aw amon kominawà kaw te kaling pedowan wedad temanan. Labi pa medaet aw meboyo kaw pineokit te belad niyo, aw iagbel se kedakel te lawa niyo doton te kilot. <sup>45-46</sup> Aw meboyo kaw heman meg-inang te salà pineokit te benis niyo, mèpiya aw tokongen niyo se benis siyan amon eked kaw peg-inang te salà, aw amon kominawà kaw te kaling pedowan wedad temanan. Labi pa medaet aw meboyo kaw pineokit te benis niyo, aw iagbel se kedakel te lawa niyo doton te kilot. <sup>47</sup> Aw meboyo kaw heman meg-inang te salà pineokit te mata niyo, mèpiya aw logiten niyo se mata niyo amon eked kaw peg-inang te salà aw amon sekopen kaw te Timanem diyà te peglowan din. Labi pa medaet aw meboyo kaw pineokit te mata niyo, aw iagbel se kedakel te lawa niyo doton te kilot, <sup>48</sup> so eked palos kematay se sapat kidoen, aw eked palos heman kepadeng se apoy, <sup>49</sup> so doen apoy medagdag diyà te kedita dan kidoen.

50 “Nayan, isanged se asin diyà te kànen amon megkèpiya se nanam. Meneng aw megkewedad se kepait te asin, eked iyan ketodà. Keilangan ontò mèpiya se eg-inangen niyo amon meinang kaw iling te mèpiya kemolò te asin eked pegkewedad se kepait niyan. Keilangan eked kaw heman pegpedindilay.”

## 10

*Tepad te pegpengognan aw pegsibwan*

*Mar. 10:1-12; Mat. 19:1-12; Luc. 16:18*

<sup>1</sup> Nayan, nesayo si Jesus lekat kidoen aw dimoton dipag te wayeg te Jordan taman te probinsya te Judiya. Medita heman se otaw netipon diyà kandin, aw migtoladà heman sikandin kandan, so yan se gayed din eg-inangen.

<sup>2</sup> Doen menge Parisiyo nengemahà te kemali diyà te pegtoladà i Jesus amon doen idimanda dan tepad kandin. Dimoton dan kandin aw minikagi dan, “Mepakay lay aw somibwan se otaw te esawa din?”

<sup>3</sup> Timaba si Jesus, “Eden lay se impunù i Moises tepad te pegsibwan?”

<sup>4</sup> Minikagi dan, “Migpunù si Moises te mepakay aw ibegay te meama se papil diyà te bayi tepad te pegsibwan din, aw penga niyan ipekesayo din.”

<sup>5</sup> Meneng minikagi si Jesus, “Migpunù si Moises te mepakay aw somibwan kaw te esawa niyo, so netegahan din te ontò magsen se olo niyo.

<sup>6</sup> Meneng gebii te peg-inang te Timanem te otaw, sebad olò se meama ininang din aw sebad olò heman se bayi. <sup>7</sup> Yan se doun te tomanan se meama te amay aw inay din, aw megsebad diyà te

esawa din. <sup>8</sup> Se didowa dan meinang sebad. Yan kenà didowa se teleesawa, so neinang dan sebad. <sup>9</sup> Nayan, so ininang dan te Timanem sebad, eked kepakay aw ipesoway dan te otaw.”

<sup>10</sup> Peg-olì i Jesus doton te balay, todà mig-insà se menge tinoledaan din tepad te pegpesibwanay. <sup>11</sup> Minikagi si Jesus, “Aw somibwan se meama te esawa din aw todà mengognan, mekelakad sikandin. <sup>12</sup> Aw somibwan se bayi te esawa din aw todà mengognan, mekelakad sikandin.”

*Si Jesus aw menge mengisù*

*Mar. 10:13-16; Mat. 19:13-15; Luc. 18:15-17*

<sup>13</sup> Nayan, doen menge otaw nengibing te dedeitek mengisù doton ki Jesus amon pemàdan din dan aw megtawal-tawal te begayan dan te Timanem te mèpiya. Sinagda dan te menge tinoledaan din. <sup>14</sup> Meneng pegkità i Jesus kenyan, neopal sikandin aw minikagi, “Ikà niyo egsagda kandan, so lomowan se Timanem diyà te otaw ontò somalig diyà kandin iling te pegsalig te mengisù diyà te amay aw inay dan. <sup>15</sup> Eneng-enengi niyo se kagi ko kenyo seini. Aw eked salig se otaw diyà te Timanem iling te pegsalig te mengisù diyà te amay dan, eked sikandin sekopi te Timanem diyà te peglowan din.”

<sup>16</sup> Penga niyan, inolid i Jesus se menge mengisù, aw nemaed sikandin kandan aw migtawal-tawal tepad kandan.

*Kelimahan te otaw meyaman*

*Mar. 10:17-31; Mat. 19:16-30; Luc. 18:18-30*

<sup>17</sup> Nayan, pegkesayo i Jesus lekat kidoen, doen sebad otaw kimagnan doton kandin,

aw limongken diyà kandin, aw mig-insà, kagi din, “Sir, ontò ka mèpiya otaw. Eden lay se keilangan inangen ko amon mekinawà ko se kaling pedowan wedad teman?”

<sup>18</sup> Minikagi si Jesus, “Nepela a so minikagi ka te mèpiya a otaw. Meneng wedad otaw ontò mèpiya, so olò Timanem se ontò mèpiya. <sup>19</sup> Netegahan no besi se menge punù ingkeliwat i Moises. Ikà egbonò. Ikà eglakad. Ikà egpenakaw. Ikà egkebolalaw tepad te doma otaw. Ikà eglegawa. Keilangan memasa ka te amay aw inay nikaw.”

<sup>20</sup> Timaba se otaw siyan, “Sir, gayed ko egtoloen se kedita niyan lekat te pegkebatà ko lamig seini.”

<sup>21</sup> Timengteng si Jesus diyà kandin, aw dakel se pedowan din kandin. Minikagi sikandin, “Sebad mendad se keilangan inangen nikaw. Oli ka den aw beligyai se kedakel te kedònan no, aw begayi se kwarta no diyà te menge otaw nelimahan. Aw yan se inangen no, doen ontong kinewaen no doton te langit. Penga te pegpemegay no te kedakel niyan, likò ka dini aw taking ka kanak.”

<sup>22</sup> Pegdineg din kenyan, timàmòd sikandin aw nesayo te nepuluk se pedowan din, so ontò dakel se kedònan din.

<sup>23</sup> Penga niyan, timengteng si Jesus diyà te menge tinoledaan din aw minikagi, “Ontò melima se pegpesakop te otaw meyaman diyà te peglowan te Timanem.”

<sup>24</sup> Nepela se menge tinoledaan din tandà te inikagi din siyan. Meneng minikagi heman si Jesus, “Ontò melima se pegpesakop te otaw diyà te peglowan te Timanem. <sup>25</sup> Pengkey ontò melima se peg-okit te ayam-ayam kamilo diyà te awang te



dagem, meneng labi pa melima se pegpesakop te otaw meyaman diyà te peglowan te Timanem.”

<sup>26</sup> Pegdineg dan kenyan, ontò dan nepela, aw minikagi dan, “Aw iling kenyan, wedad palos otaw mekelowà lekat te pelumun te Timanem.”

<sup>27</sup> Meneng timengteng si Jesus diyà kandan aw minikagi, “Pengkey eked pekelowà se otaw lekat te pelumun te Timanem, meneng mebatog ipelowà te Timanem se otaw lekat te pelumun, so wedad palos eked kebatog te Timanem.”

<sup>28</sup> Penga niyan, minikagi si Pedro, “Meneng sikami, tinenanan day den se kedakel amon tomaking kay kamno.”

<sup>29</sup> Minikagi si Jesus, “Eneng-enengi niyo se kagi ko kenyo seini. Se otaw timanan den te kedònan din, aw kedowa din, aw amay din aw inay din, aw batà din, aw pawà din, amon tomaking kanak aw amon megtoladà te menge doma otaw tepad te Mèpiya Indan, <sup>30</sup> yan se metoman kominawà te ontong ginatos pa meelagà diyà te tinenanan din dalem te eked pa kematay. Pengkey egpemi-langen sikandin, meneng metoman sikandin begayan te menge kedònan, aw kedowa, aw inay, aw batà, aw pawà, aw begayan heman sikandin te kaling pedowan wedad teman te modi al-daw. <sup>31</sup> Meneng medita se otaw melangkaw songkani meinang ontò medanà doton te peglowan te Timanem. Medita heman se otaw medanà songkani, meneng meinang dan kwani melangkaw.”

*Iketelo peg-ikagi i Jesus tepad te kemetayun din  
Mar. 10:32-34; Mat. 20:17-19; Luc. 18:31-34*

<sup>32</sup> Nayan, minipanaw si Jesus aw menge tinoledaan din pesalo doton te Jerusalem. Pegpesalo dan doton, minipanaw si Jesus diyà te monà dan. Nepela se menge tinoledaan din te ibeg din domoton te Jerusalem. Doen heman menge otaw timaking kandin nelemitan. Meneng migtipon si Jesus te sìyan sempolò teg dowà tinoledaan din, aw mig-indan diyà kandan aw eden se metoman domateng diyà kandin, <sup>33</sup> kagi din, “Na, domoton kidon den te Jerusalem. Penga niyan, siak Timanem Migpekeotaw se itolok, aw ibegay a diyà te belad te menge pengolo te simbahan aw menenoladà te punù ingkeliwat i Moises. Megsebad dan mikagi te keilangan imetayan a. Ibegay a dan heman diyà te belad te menge otaw kenà Judiyo. <sup>34</sup> Kebebeyatan a dan, aw teptepan a dan, aw bedasen a dan, aw penga niyan imetayan a dan. Penga te telo se aldaw, meantay a lekat te nematay.”

*Pinemoyò i Santiago aw si Juan*

*Mar. 10:35-45; Mat. 20:20-28*

<sup>35</sup> Penga niyan, dimoton ki Jesus se didowa batà i Sebedeo si Santiago aw si Juan. Minikagi dan, “Sir, ibeg day inangen no diyà kenami se pemoyoen day diyà kamno.”

<sup>36</sup> Minikagi si Jesus, “Eden lay se ibeg niyo inangen ko diyà kenyo?”

<sup>37</sup> Minikagi dan, “Aw megtebò ka lomowan, peonsadi kay bag diyà te tangkil nikaw, sebad lenged te kowanan, aw sebad lenged te bibang, amon segmanen kay heman doma nikaw.”

<sup>38</sup> Meneng minikagi si Jesus, “Wedà niyo kete-gahi aw eden se kebegat te pinemoyò niyo. Meke-tayod kaw lay heman te kelimahan agpet den domateng kanak? Meketayod kaw lay heman te kegemakan agpet den domateng kanak?”

<sup>39</sup> Timaba dan, “Ee, meketayod kay heman kenyan.”

Minikagi si Jesus, “Metoman kaw heman de-tengan te kelimahan aw kegemakan domateng kanak, <sup>40</sup> meneng eked a pegpakang kenyo te sikiyo se meketangkil diyà kanak, so tomangkil diyà kanak se otaw tapay pinemallì.”

<sup>41</sup> Pegdineg te sempolò tinoledaan aw eden se inikagi dan diyà ki Jesus, neopal dan diyà ki Santi-ago aw si Juan. <sup>42</sup> Meneng tinawal dan i Jesus aw minikagi sikandin, “Netegahan niyo den aw eden se eg-inangen te menge otaw eglowan. Gayed dan egleges te menge sakop dan. Gayed heman egsogò-sogò se menge melangkaw otaw te menge sakop dan. <sup>43</sup> Meneng eked kepakay aw meg-iling kaw kandan. Aw doen otaw diyà kenyo meibeg megkelangkaw, keilangan gayed sikandin mena-bang kenyo. <sup>44</sup> Aw doen otaw diyà kenyo meibeg megkelangkaw, keilangan megpedanà sikandin te kandin pegkeotawun iling te kedanà te allang. <sup>45</sup> Keilangan meg-iling sikandin kanak Timanem Migpekeotaw, so dimini a te tanà kenà amon tebangan a te otaw, meneng dimini a amon mena-bang a te otaw. Neketagad a den imetayan amon medita se otaw mekelowà lekat te pegkeallang dan diyà te salà.”

*Pinegolì i Jesus se otaw bota si Bartimeo*

*Mar. 10:46-52; Mat. 20:29-34; Luc. 18:35-43*

<sup>46</sup> Nayan, minokit si Jesus aw minge tinoledaan din diyà te lonsod te Jeriko. Ontò medita se doma otaw timaking kandan. Pegkesayo dan lekat te Jeriko, doen otaw bota nenenoo doton te kilid te dalan, ngadan din si Bartimeo batà i Timeo.

<sup>47</sup> Pegdineg din te si Jesus tege Nasarit se minokit kidoen, timawal sikandin, kagi din, “Jesus, bowad-bowad i David, keidowi a bag.”

<sup>48</sup> Medita se otaw migpunù te keilangan mepenek sikandin. Meneng labi beling sikandin timawal, “Bowad-bowad i David, keidowi a bag.”

<sup>49</sup> Pegdineg i Jesus te pegtawal din, simagked sikandin aw minikagi, “Pedinihi niyo sikandin.”

Penga niyan, minangay dan kandin, kagi dan, “Peseligi se pedowan nikaw. Tindeg ka den, so impeangay ka din.”

<sup>50</sup> Penga niyan, ayas timindeg aw tinenanan din se kayab din, aw dimoton ki Jesus. <sup>51</sup> Pegdateng din doton, minikagi si Jesus, “Eden lay se ibeg no inangen ko kamno?”

Minikagi se otaw bota, “Sir, ibeg ko, todà a komità.”

<sup>52</sup> Minikagi si Jesus, “Mepakay aw molì ka den. Negolian ka den so simalig ka diyà kanak.”

Pegketà, kimità sikandin, aw timaking ki Jesus.

## 11

*Pegdateng i Jesus doton te Jerusalem*

*Mar. 11:1-11; Mat. 21:1-11; Luc. 19:28-40; Juan 12:12-19*

<sup>1</sup> Nayan, pegpesalo dan doton te Jerusalem, migpedapag dan kidoen te lonsod te Bitpahi aw Bitanya doton te ongan te bontod te Olibo. Insogò i Jesus se didowa tinoledaan din, <sup>2</sup> kagi din, “Onà kaw den doton te lonsod sida peselowan tadon. Aw domateng kaw doton, ketelaan niyo se nati te kodà. Iniketan iyan, meneng wedà iyan lumun kesekayi te otaw. Lebadi niyo, aw ibingi niyo dini. <sup>3</sup> Aw doen otaw meg-insà kenyo te nengà lay linebad niyo iyan, ikegihi niyo te keilangan sekayan iyan te Pengolo niyo, aw ipeolì din iyan te eked kenamay.”

<sup>4</sup> Penga niyan, nesayo dan, aw netelaan dan se nati te kodà iniketan diyà te lelebaran te balay medapag te dalan. Penga niyan, linebad dan iyan. <sup>5</sup> Meneng mig-insà se menge otaw kidoen, “Nengà lay linebad niyo iyan?”

<sup>6</sup> Yan mig-indan se didowa tinoledaan i Jesus tepad te insogò din kandan, aw penga niyan mepakay iyan diyà te tig-apò. <sup>7</sup> Penga niyan, inibing dan se nati doton ki Jesus. Menge saol dan se in-ampal dan diyà te getan te nati, aw simakay si Jesus kenyan. <sup>8</sup> Medita se otaw migladlad te saol dan doton te dalan peselowan din, aw sinagpì te menge doma otaw se menge pelapà te palmera aw insawol dan doton te dalan, so yan se ketanem dan aw segmanen dan se otaw meinang selotan. <sup>9</sup> Migpegais se kedita te otaw timaking ki Jesus, pengkey nekeonà aw timetondog. Migpegais dan, “Iduyun se Timanem. Iduyun se Pengolo tadon insogò din. <sup>10</sup> Iduyun se peglowan din iling te peglowan te kemonaan tadon gebii si David. Iduyun

se Timanem.”

<sup>11</sup> Pegdateng i Jesus doton te Jerusalem, dimoton sikandin te dakel simbahan kidoen. Pegtengteng din diyà te kedita, limikò sikandin doton te Bitanya sipat sìyan sempolò teg dowo tinoledaan din, so ontò den meapon.

*Wedad pongo te kayo igira*

*Mar. 11:12-14; Mat. 21:18-19*

<sup>12</sup> Pegkeiselem niyan, minipanaw dan lekat te Bitanya pesalo doton te Jerusalem. Te wedà dan pa dateng doton, binallos si Jesus. <sup>13</sup> Kinità din se kayo igira te mediyò. Dimawen iyan, aw dimoton sikandin amon mahà te pongo niyan. Meneng pegdateng din doton, wedad palos pongo kinità din, olò minge dawen. Wedà pa dateng se aldaw te pegpongo din. <sup>14</sup> Minikagi sikandin diyà te kayo, “Eked den palos pongo se kayo seini.”

Dineg te minge tinoledaan din se inikagi din sìyan.

*Dimoton si Jesus te dakel simbahan*

*Mar. 11:15-19; Mat. 21:12-17; Luc. 19:45-48; Juan 2:13-22*

<sup>15</sup> Pegdateng i Jesus doton te Jerusalem, dimoton sikandin te dakel simbahan, aw impekadas din se kedita te otaw egpemeligiya aw egbayad kidoen te dowangen niyan. Impelias din se lemisa te minge otaw eqliwan te kwarta, aw impelias din heman se bangkò te minge otaw egpemeligiya te selepati ibegay diyà te Timanem. <sup>16</sup> Sinagda din heman se kedita te otaw nengibing te kedònan dan minokit te dowangen te dakel simbahan. <sup>17</sup> Penga

niyan, migtoladà sikandin, kagi din, “Doen kagi te Timanem impesolat din gebii,

‘Se balay te Timanem, yan se ingedanan balay te pegtawal-tawal te kedita te otaw te keneyonan.’

Meneng ininang niyo den ini iling te ogpeanan te megdedempasay.”

<sup>18</sup> Meneng doen menge pengolo te simbahan aw menenoladà te punù ingkeliwat i Moises dimineg te inikagi i Jesus. Penga niyan, miglalang dan te imetayan dan sikandin. Nelemitan dan ki Jesus, so ontò nepela se kedita te otaw tepad te intoladà din.

<sup>19</sup> Pegsallep te aldaw siyan, nesayo si Jesus aw menge tinoledaan din lekat te Jerusalem aw minolì dan.

### *Pegkelanes te kayo igira*

*Mar. 11:20-26; Mat. 21:20-22*

<sup>20</sup> Pegkeiselem niyan, te peglikò dan doton te Jerusalem, kinità dan se kayo igira nelanes den pengkey dalid. <sup>21</sup> Neeneng-enengan i Pedro aw eden se neinang, aw minikagi sikandin diyà ki Jesus, “Sir, tengtengi se kayo inikegiyan no gebenini nelanes den.”

<sup>22</sup> Minikagi si Jesus, “Aw megtawal-tawal kaw diyà te Timanem, keilangan somalig kaw diyà kandin. <sup>23</sup> Eneng-enengi niyo se kagi ko kenyo seini. Aw mikagi se otaw diyà te bontod seini te meabat iyan aw mealin doton te dagat, aw kenà egdowa-dowa se pedowan din, meneng egpemenal te metoman se kagi din, metoman iyan meinang. <sup>24</sup> Yan mikagi a den diyà kenyo, aw

megtawal-tawal kaw diyà te Timanem, keilangan memenal kaw te binegayan kaw din den te pinemoyò niyo, aw metoman kinewaen niyo iyan. <sup>25</sup> Aw megtawal-tawal kaw, aw doen salà ininang te doma otaw diyà kenyo wedà niyo pa pegwedadi, pegwedadi niyo iyan amon pegwedaden heman te Timanem se salà ininang niyo diyà kandin. [ <sup>26</sup> Meneng aw eked niyo pegwedadi se salà ininang te doma otaw diyà kenyo, eked heman pegwedadi te Timanem Amay se salà ininang niyo diyà kandin.]”

*Insà tepad te pegsogò ki Jesus*

*Mar. 11:27-33; Mat. 21:23-27; Luc. 20:1-8*

<sup>27</sup> Pegdateng dan doton te Jerusalem, minipanaw si Jesus kidoen te dakel simbahan. Wedà kenamay, doen menge pengolo te simbahan aw menenoladà te punù aw menge obanen te Judiyo dimoton ki Jesus. <sup>28</sup> Mig-insà dan, “Nengà lay eg-inang ka te kedita nini? Sinu lay se simogò kamno?”

<sup>29</sup> Minikagi si Jesus, “Doen heman insà ko kenyo. Aw meketaba kaw kani, meg-indan a kenyo aw sinu se simogò kanak. <sup>30</sup> Sinu lay se simogò ki Juan amon memonyag? Timanem lay, aw otaw se simogò kandin?”

<sup>31</sup> Penga niyan, migpebelaw-belaway dan aw eden se itaba dan kandin. Minikagi dan, “Simpana tomaba kidon te Timanem se simogò ki Juan, silahen kidon din, so wedà kidon pemenal ki Juan. <sup>32</sup> Meneng eked kidon heman taba te olò otaw se simogò ki Juan.”



Eked dan ikagi te olò otaw se simogò ki Juan, so nelemitan dan aw keopalan dan te kedita te otaw netipon, so eg-aneng-aneng se kedita te otaw te ontò telekeliwat te kagi te Timanem si Juan. <sup>33</sup> Yan se doun te minikagi dan, “Inday. Wedà day ketegahi aw sinu.”

Minikagi si Jesus, “So wedà kaw taba te insà ko, eked a peg-indan kenyo aw sinu se simogò kanak.”

## 12

*Tegdeyanan tepad te minge otaw migtonggò te pawà*

*Mar. 12:1-12; Mat. 21:33-46; Luc. 20:9-19*

<sup>1</sup> Nayan, mig-indan si Jesus te minge tegdeyanan diyà te medita otaw netipon kidoen. Minikagi sikandin, “Doen otaw migpawà aw nenanem te paras. Mig-inang sikandin te alad, aw tigemसान te paras, aw layag. Penga niyan, impetonggò din iyan te minge doma otaw, aw dimoton te mediyò ogpeanan. <sup>2</sup> Pegdateng te aldaw te peglegani, doen sineligan insogò te tig-apò amon doen talad ebaten din lekat te minge otaw impetonggò din. <sup>3</sup> Meneng pegdateng te sogounun doton kandan, binadas dan sikandin aw impekesayo dan te wedad palos imbegay kandin. <sup>4</sup> Penga niyan, doen doma sineligan insogò te tig-apò. Meneng binonalan dan sikandin diyà te olo, aw ontò dan pa pigyàyà. <sup>5</sup> Penga niyan, doen doma sineligan insogò te tig-apò. Meneng inimetayan dan. Medita pa se sineligan insogò din doton kandan, meneng doen binadas dan, aw doen heman inimetayan dan. <sup>6</sup> Se temanan insogò

din, yan se batà din egkedekelan din te pedowan, so aneng-aneng din keilangan segmanen dan se kandin batà. <sup>7</sup> Meneng pegdateng te batà din doton, migpebelaw-belaway dan, ‘Seini se meketig-apò te tanà seini aw matay se amay din. Mèpiya aw imetayan tadon sikandin amon sikitadon den se meketig-apò te tanà seini.’ <sup>8</sup> Penga niyan, inimetayan dan sikandin aw in-agbel dan se lawa din doton te lowà te pawà.

<sup>9</sup> “Nayan, meg-indan a den diyà kenyo aw eden se inangen te tig-apò diyà kandan. Domoton sikandin aw imetayan din se kedita dan, aw ipetonggò din se pawà din te doma otaw. <sup>10</sup> Migbasa kaw den besi te kagi te Timanem seini insolat,

‘Doen bato in-agbel te munge otaw mig-inang te balay, so eden dan aw wedad kekemowan niyan. Meneng yan se bato ontò salig te balay. <sup>11</sup> Mèpiya se ininang te Pengolo sìyan, aw yan se doun te iduyun tadon sikandin.’ ”

<sup>12</sup> Pegdineg te munge obanen te Judiyo kenyan, netegahan dan te sikandan se nesogatan te tegdeyanan din sìyan, aw yan se doun te ibeg dan megdakep peden kandin. Meneng wedà dan peketoman, so nelemitan dan te munge otaw gayed egpenenalan kandin. Penga niyan, nesayo dan lekat kidoen.

*Insà tepad te pegbayad te mihoras*

*Mar. 12:13-17; Mat. 22:15-22; Luc. 20:20-26*

<sup>13</sup> Wedà kenamay, doen munge Parisiyo aw munge sakop i Herod insogò dan doton ki Jesus, so ibeg dan doen idimanda dan tepad te pegtoladà

din. <sup>14</sup> Pegdateng dan doton ki Jesus, minikagi dan, “Sir, netegahan day te kenà ka egkebolalaw. Netegahan day heman te pengkey sinu se otaw toledaan nikaw, gayed ka egtoladà te kebenalan tepad te ibeg te Timanem. Nayan, doen insà day kamno. Lomàpang kidon lay te menge punù ingkeliwat i Moises aw mayad kidon te mihoras diyà te gobirno te Roma? Mepakay lay aw eked?”

<sup>15</sup> Meneng netegahan i Jesus te medaet se tod dan te peg-insà dan kenyan. Yan minikagi sikandin, “Medaet se pegtandà niyo kanak. Peki-tai niyo kanak se kwarta ipegbayad niyo te mihoras.”

<sup>16</sup> Penga niyan, imbegay dan diyà kandin se kwarta plata. Mig-insà si Jesus, “Sinu lay bawa se insawol kidoen? Sinu lay ngadan se insolat kidoen?”

Timaba dan, “Selotan te Roma.”

<sup>17</sup> Minikagi si Jesus, “Begayi niyo diyà te selotan se keilangan ibegay niyo diyà kandin, aw begayi niyo heman diyà te Timanem se keilangan ibegay niyo diyà kandin.”

Pegdineg dan kenyan, nepela dan.

*Insà tepad te pegkeantay lekat te nematay*

*Mar. 12:18-27; Mat. 22:23-33; Luc. 20:27-40*

<sup>18</sup> Doen heman menge Sadusiyo dimoton ki Jesus. Yan se menge otaw egtoladà te eked palos keantay se otaw lekat te nematay. Mig-insà dan diyà ki Jesus, kagi dan, <sup>19</sup> “Sir, doen impunù i Moises kenitadon tepad te inangen te telekedowa meama. Aw matay se meama te wedad pa batà te esawa din, keilangan mengognan se kedowa te nematay diyà te nayi din nebalò, amon doen

peden batà te kedowa din nematay. <sup>20</sup> Na, doen ekon pito telekedowa meama. Nengognan se kakay dan, aw nematay sikandin te wedad pa batà dan. <sup>21</sup> Penga niyan, nengognan se ikedowa meama te nayi din nebalo, meneng nematay heman sikandin te wedad pa batà dan. Onawa heman se neinang te iketelo meama. <sup>22</sup> Migpetibos-tibosay se pito telekedowa nengognan te bayi siyan, meneng nematay se kedita dan te wedad pa palos batà dan. Penga niyan, nematay heman se bayi. <sup>23</sup> Nayan, indani kay. Aw meantay se otaw lekat te nematay, sinu lay lebò diyà kandan se ontò esawa te bayi siyan? So migpetibos-tibosay dan se pito nengognan kandin.”

<sup>24</sup> Minikagi si Jesus, “Ontò kaw migkemali, so wedà niyo pa kelebete se kagi te Timanem insolat, aw wedà niyo heman ketegahi aw eden se mebatog inangen te Timanem pineokit te tolos din. <sup>25</sup> Aw entayen te Timanem se munge otaw lekat te nematay, eked dan palos pengognan, so iling dan te munge anghil eg-ogpà doton te langit. <sup>26</sup> Wedà kaw ketaga-taga te metoman meantay se otaw lekat te nematay, so wedà kaw besi pegbasa te libro insolat i Moises gebii. Pegsolat din tepad te pegpekità te Timanem diyà kandin kidoen te sagbet limegdeg, minikagi se Timanem diyà kandin, ‘Siak se Timanem gayed egseligan i Abraham, aw si Isaac, aw si Jacob.’ <sup>27</sup> Yan kenà otaw wedad pedowan se egsalig te Timanem, meneng otaw doen pedowan se egsalig kandin. Yan se doun te ontò kaw migkemali.”

*Ontò melangkaw punù*

*Mar. 12:28-34; Mat. 22:34-40; Luc. 10:25-28*

<sup>28</sup> Nayan, dimateng se sebad menenoladà te punù ingkeliwat i Moises, aw dinineg din se pegpebelaw-belaway dan. Pegketaga-taga din te mèpiya se intaba i Jesus kandan, mig-insà sikandin, “Diyà te kedita te punù ingkeliwat i Moises, eden lay punui se ontò melangkaw?”

<sup>29</sup> Minikagi si Jesus, “Seini se punù ontò melangkaw.

‘Kedita niyo minge bowad-bowad i Israel, pene-nalan kaw kanak. Sebad olò se Timanem, aw sikandin se Pengolo tadon. <sup>30</sup> Kedekeli niyo te pedowan se Pengolo niyo Timanem te ontò melobos se pedowan niyo kandin, aw aneng-aneng niyo.’

<sup>31</sup> Seini se punù neketondog kenyan.

‘Kedekeli niyo te pedowan se doma otaw iling te peg-aneng-aneng niyo te kenyo pegkeotawun.’

Wedad palos punù labi pa melangkaw diyà te didowa punù sìyan.”

<sup>32</sup> Minikagi se menenoladà sìyan, “Sir, neketotok se intaba nikaw. Benal se inikagi no te sebad olò se Timanem, aw wedad doma timanem lowà pa diyà kandin. <sup>33</sup> Benal heman se inikagi no te keilangan kedekelan tadon sikandin te pedowan te ontò melobos se pedowan tadon kandin, aw keilangan kedekelan tadon te pedowan se doma otaw iling te peg-aneng-aneng tadon te kenitadon pegkeotawun. Pengkey mèpiya se pegpengimatay aw pegsonog tadon te ayam-ayam ibegay diyà

te Timanem, meneng labi pa mèpiya aw tomolò kidon te didowa punù sỳan.”

<sup>34</sup> Pegdineg i Jesus te mèpiya se intaba din, minikagi sikandin, “Agpet den se pegpesakop no diyà te peglowan te Timanem.”

Lekat te aldaw sỳan, wedad palos otaw migtelaman mig-insà ki Jesus.

*Migtoladà si Jesus tepad te Misiyas*

*Mar. 12:35-37; Mat. 22:41-46; Luc. 20:41-44*

<sup>35</sup> Nayan, pegtoladà i Jesus doton te dakel simbahan, minikagi sikandin, “Benal se ipegtoladà te minge menenoladà te punù ingkeliwat i Moises te bowad-bowad i David se Misiyas isogò te Timanem dini kenyo. <sup>36</sup> Meneng minikagi si David te Pengolo din se Misiyas. Pineokit te pegbayà-bayà te Espiritu Santo ki David, insolat din se kagi seini,

‘Minikagi se Timanem diyà te Pengolo ko, Penenoo ka dini te tangkil ko lamig dàgen ko se minge poon no aw ipetolò ko dan kamno.’

<sup>37</sup> Na, so minikagi si David te Pengolo din se Misiyas, kenà olò bowad-bowad din se Misiyas, meneng Pengolo din heman.”

*Menge menenoladà te punù ingkeliwat i Moises*

*Mar. 12:37-40; Mat. 23:1-36; Luc. 20:45-47*

Neluba se kedita te otaw nenenalan ki Jesus.

<sup>38</sup> Pegtoladà din, minikagi sikandin, “Peg-ahà kaw te minge menenoladà te punù ingkeliwat i Moises. Gayed dan egpenaol te melayat, aw ibeg dan segmanen dan te doma otaw doton te pedyanan. <sup>39</sup> Ibeg dan heman menenoo doton te mèpiya onsedanan kidoen te simbahan te

Judiyo. Aw doen dakel kànen, ibeg dan sikandan se monà ipekaen. <sup>40</sup> Meneng sikandan se egagaw te kedònan te minge bayi balo, aw penga niyan menamay se pegtawal-tawal dan amon megpelingo-lingo dan te melobos se pedowan dan diyà te Timanem. Meneng metoman dan ontò ipelumun labi pa diyà te doma otaw.”

*Imbowang te bayi balo se kedakel te kwarta din  
Mar. 12:41-44; Luc. 21:1-4*

<sup>41</sup> Nayan, nenenu si Jesus doton didalem te dakel simbahan te Jerusalem medapag te solanan te kwarta ibowang diyà te Timanem. Timengteng sikandin diyà te minge otaw egawol te kwarta dan kidoen. Medita se otaw meyaman egawol te dakel kwarta ibowang dan. <sup>42</sup> Penga niyan, dimateng se sagkep bayi balo, aw migsawol sikandin te didowa kedakò kidoen wedad nael keelagà niyan. <sup>43</sup> Penga niyan, tinawal i Jesus se minge tinoledaan din, aw minikagi sikandin, “Eneng-enengi niyo se kagi ko seini. Pengkey dakel se imbowang te kedita te doma otaw migsawol te kwarta kidoen, meneng labi pa meelagà se imbowang te bayi balo sida. <sup>44</sup> Dakel se kwarta te doma otaw aw eked dan kelimahi tandà te pegpemegay dan. Meneng se bayi sida sagkep, tinigkan din imbowang se kedakel te kedònan din, pengkey nelimahan sikandin.”

## 13

*Keteboan te kelimahan*

*Mar. 13:1-13; Mat. 24:1-14; 10:17-22; Luc. 21:5-*

<sup>1</sup> Nayan, peglowà i Jesus lekat te dakel simbahan te Jerusalem, doen sebad tinoledaan din minikagi, “Sir, tengtengi se menge balay te simbahan, so mèpiya se bawa niyan, aw ininang iyan te bato mèpiya se bawa niyan.”

<sup>2</sup> Minikagi si Jesus, “Pengkey induyun niyo se dakel simbahan seini, meneng tigkan iyan kebàtan te modi aldaw, aw wedad palos bato ketenan an diyà te lanto te doma bato.”

<sup>3</sup> Wedà kenamay, dimoton dan te bontod te Olibo dipag te dakel simbahan. Nenenoo si Jesus, aw dimoton kandin si Pedro, si Santiago, si Juan, aw si Andres te wedad doma dan. Mig-insà dan, <sup>4</sup> “Indani kay. Kano lay ketoman se in-indan nikaw? Eden lay se pengilala kitaen day aw agpet metoman se kedita niyan?”

<sup>5</sup> Minikagi si Jesus, “Peg-ahà kaw amon eked kaw keekali. <sup>6</sup> Doen kwani medita otaw megpelingo-lingo te insogò ko dan. Mikagi dan te sikandan se Misiyas, aw medita se otaw keekalan dan aw tomaking kandan. <sup>7</sup> Aw domineg kaw te doen gira aw menge samok, ikà niyo egkelemitan. Keilangan onà iyan meinang, meneng kenà pa niyan se teman an te keneyonan. <sup>8</sup> Medita se otaw meggira, so doen pongan megbolaw diyà te doma pongan, aw doen heman menge sakop te sebad selotan megbolaw diyà te menge sakop te doma selotan. Megelà se otaw te medita ogpeanan tandà te linog aw bayil domateng diyà kandan. Pengkey medaet iyan, meneng yan olò se keteboan te kelimahan domateng dini te keneyonan, iling te keteboan te mesakit domateng te bayi agpet tebawan.



<sup>9</sup> “Meneng peg-ahà kaw, so ibingen kaw te doma otaw doton te howis, aw bedasen kaw dan kidoen te menge simbahan te Judiyo. Ipeibing kaw doton te menge gobirnadur aw selotan tandà te pegpe-sakop niyo diyà kanak, amon mekeindan kaw te kebenalan tepad kanak diyà kandan. <sup>10</sup> Keilangan onà itoladà se Mèpiya Indan diyà te kedita te otaw te eked pa dateng se temanana te keneyonan. <sup>11</sup> Aw ibingen kaw doton te otaw meg-okom kenyo, ikà niyo egketetana aw eden se ikegiyen niyo kandan. Dalem te aldaw siyan, begayan kaw te kebiyasa amon meketaba kaw kandan, so kenà lekat te kenyo kebiyasa se ikegiyen niyo, meneng lekat iyan te Espiritu Santo. <sup>12</sup> Doen menge otaw meg-tolok te kandan menge kedowa amon imetayan dan. Doen heman amay megtolok te kandan menge batà amon imetayan dan. Doen heman menge otaw eked pegsagman te kandan amay aw inay, aw ipeimatay dan. <sup>13</sup> Kebensihan kaw te keditaan te otaw tandà te pegpesakop niyo diyà kanak. Meneng aw tomayod kaw te kedita te kelimahan, ipelowà kaw.”

*Kedaet te kelimahan*

*Mar. 13:14-23; Mat. 24:15-28; Luc. 21:20-24*

<sup>14</sup> “Doen pa domateng meg-inang te medaet doton te dakel simbahan te Jerusalem, pengkey eked iyan kepakay, aw ontò mekelamit te otaw. (Keilangan kelebetan iyan te kedita te otaw meg-basa te kagi din siyan insolat.) Aw kitaen niyo iyan doton te dakel simbahan, keilangan komadas se kedita te otaw lekat te Judiya pesalo doton te bontod. <sup>15</sup> Keilangan eked awop diyà te balay

din se otaw doton te lowà amon ebaten din se kedònan, meneng keilangan tenanan din se kedita. <sup>16</sup> Se otaw egterbaho doton te pawà, eked heman olì amon ebaten din se ekasan, meneng keilangan komadas. <sup>17</sup> Mekelelayò heman se menge bayi mebedes aw egsosowan te aldaw sìyan. <sup>18</sup> Pegtawal-tawal kaw diyà te Timanem te kenà pengodan se pegkadas niyo, <sup>19</sup> so ontò medaet se kelimahan domateng diyà te keneyonan. Wedad palos kelimahan labi pa medaet diyà kenyan lekat te peg-inang te Timanem te keneyonan lamig seini, aw wedad palos heman kelimahan domateng labi pa medaet diyà kenyan. <sup>20</sup> Meneng pekebebaen te Timanem se kenamay te aldaw te kelimahan sìyan amon eked kegelà se kedita te otaw. Pekebebaen din iyan tandà te menge otaw pinemallì din.

<sup>21</sup> “Aw domateng se aldaw sìyan, aw doen otaw mikagi, ‘Na, dini den se Misiyas,’ aw doen otaw mikagi, ‘Na, doton se Misiyas,’ ikà niyo egpemenal kandan, <sup>22</sup> so doen menge otaw domateng megpelingo-lingo te sikandan se Misiyas aw menge telekeliwat te kagi te Timanem. Meg-inang dan heman te menge kepelahan amon keekalan dan peden heman se menge otaw pine-mallì te Timanem. <sup>23</sup> Meneng peg-ahà kaw, so mig-indan a den te kedita diyà kenyo te eked pa dateng.”

*Peglikò te Timanem Migpekeotaw*

*Mar. 13:24-27; Mat. 24:29-31; Luc. 21:25-28*

<sup>24</sup> “Aw mepenga se kelimahan sìyan, megken-gitngit se keneyonan, so eked ebey senang se

aldaw aw bolan. <sup>25</sup> Medagdag heman se munge bitoen lekat te langit, so mebilit se kedita dan. <sup>26</sup> Penga niyan, kitaen te kedita te otaw se pegdateng ko, so lomikò a Timanem Migpekeotaw tekingan te labon. Komità dan te ontò a metolos aw melangkaw a. <sup>27</sup> Isogò ko se munge anghil, aw ipetipon ko se kedita te otaw pinemallì ko lekat te kebelad te keneyonan, pengkey kenan dan pegogpà.”

*Tegdeyanan tepad te kayo igira*

*Mar. 13:28-31; Mat. 24:32-35; Luc. 21:29-33*

<sup>28</sup> “Penenalan kaw den te tegdeyanan seini tepad te kayo igira. Aw tomobed iyan aw domawen, ketegahan niyo te agpet den domateng se pengaldaw. <sup>29</sup> Iling heman kenyan, aw kitaen niyo se pegketoman te kedita niyan inikagi ko diyà kenyo, ketegahan niyo te agpet a den lomikò. <sup>30</sup> Eneng-enengi niyo se kagi ko kenyo seini. Doen munge otaw komità te pengilala siyan, eked dan kematay singed aw metoman se kedita niyan. <sup>31</sup> Doen temanan te langit aw tanà, meneng gayed metoman se kagi ko te wedad temanan.”

*Wedad netaga-taga aw kano likò*

*Mar. 13:32-37; Mat. 24:36-44*

<sup>32</sup> “Meneng eked ko indani aw eden eldawi aw orasi se peglikò ko. Wedad palos netaga-taga aw kano a likò, pengkey munge anghil doton te langit, so olò Amay ko se netaga-taga kenyan. <sup>33</sup> Keilangan gayed kaw megpeketagad, so wedà niyo ketegahi aw eden eldawi se pegketoman niyan. <sup>34</sup> Iling a te otaw domoton te mediyò ogpeanan. Te eked pa kesayo, doen ipunù din diyà

te kedita te sineligan din, so doen inangen te teg sebad-sebad kandan te iyogan din. Megpunù heman sikandin te keilangan gayed megpeketagad se otaw egbantay te balay din. <sup>35</sup> Yan se doun te keilangan gayed kaw megpeketagad, so wedà niyo ketegahi aw eden orasi se peglikò te Pengolo niyo, atok te pegsallep te aldaw, atok megtengà te delem, atok eked pa libtak se aldaw, atok iselem. Yan se doun te keilangan gayed kaw megpeketagad, <sup>36</sup> so aw lomikò a te wedà kaw pa peketagad, kitaen ko sikiyo timedogi pa. <sup>37</sup> Se impunù ko kenyo seini, yan se ipunù ko heman diyà te kedita te otaw, te keilangan megpeketagad se teg sebad-sebad otaw.”

## 14

### *Peglalang te medaet inangen ki Jesus*

*Mar. 14:1-2; Mat. 26:1-5; Luc. 22:1-2; Juan 11:45-53*

<sup>1</sup> Nayan, dowà mendad se aldaw te pegdateng te Pista te Pegpelowà. Yan se pegpengaen dan te pan kenà eglebag. Gayed mig-aneng-aneng se menge pengolo te simbahan aw menenoladà te punù aw eden se inangen dan amon dekepen dan si Jesus te wedad pa doma otaw metaga-taga amon imetayan dan. <sup>2</sup> Minikagi dan, “Keilangan eked kidon pegdakep kandin dalem te pista, amon eked pegsamok se kedita te otaw.”

### *Pegtoyong ki Jesus kidoen te Bitanya*

*Mar. 14:3-9; Mat. 26:6-13; Juan 12:1-8*

<sup>3</sup> Nayan, pegdoton i Jesus te lonsod te Bitanya, limaoy sikandin ki Simon, siyan otaw pinegolian

din te tompig. Dalem te pegpengaen dan, doen bayi nengibing te lana metinadeg insawol diyà te deitek botilya. Ontò iyan meelagà so ininang te ontò nardo. Penga niyan, linebak din se botilya aw intoyong din se lana diyà te olo i Jesus. <sup>4</sup> Na, doen menge otaw kidoen mig-aneng-aneng, “Tay law. Pigbàtan din se lana siyan. <sup>5</sup> Simpana ibeligyà iyan, ginatos pa se kwarta dinaryo iteped peden diyà te menge otaw sagkep.”

Sinila dan heman se bayi siyan. <sup>6</sup> Meneng minik-agi si Jesus, “Pebeyai niyo sikandin. Ikà niyo egsila te bayi siyan. Mèpiya se ininang din diyà kanak. <sup>7</sup> Gayed doen otaw sagkep mebatog niyo tebangan pengkey kano doen ibeg niyo. Meneng eked a gayed peg-ogpà dini kenyo. <sup>8</sup> Ininang te bayi siyan se mebatog din inangen. Pineokit te pegtoyong din te lana siyan diyà kanak, impetagad a din te peglebeng kanak. <sup>9</sup> Eneng-enengi niyo se kagi ko seini. Eked palos sikandin kelibeli, so pengkey kenan toledai se Mèpiya Indan doton te kebelad te keneyonan, iindan heman se ininang te bayi siyan.”

*Pegpakang i Judas te pegtolok din ki Jesus*

*Mar. 14:10-11; Mat. 26:14-16; Luc. 22:3-6*

<sup>10</sup> Nayan, doen sebad tinoledaan i Jesus ngadan din si Judas Iscariote. Dimoton sikandin te menge pengolo te simbahan aw migpebelaw-belaway dan tepad te pegtolok din ki Jesus amon dekepen dan. <sup>11</sup> Pegdineg dan te kagi din, neluba dan aw migpakang dan te doen kwarta ibegay dan diyà kandin. Penga niyan, migtagad si Judas te mèpiya aldaw amon itolok din si Jesus.

*Pista te Pegpelowà*

*Mar. 14:12-21; Mat. 26:17-25; Luc. 22:7-14,21-23; Juan 13:21-30*

<sup>12</sup> Nayan, dimateng se tagnà aldaw te pista te pegpengaen te menge Judiyo te pan kenà eglebag. Yan heman se aldaw te pegpengiyaw dan te nati te karniro kànen dan te Pista te Pegpelowà. Dimoton se menge tinoledaan i Jesus kandin aw mig-insà dan, kagi dan, “Kenan kay lay peg-inang te kànen tadon te Pista te Pegpelowà?”

<sup>13</sup> Penga niyan, insogò din se didowa tinoledaan din, kagi din, “Doton kaw te Jerusalem. Aw domateng kaw doton, kitaen niyo se otaw neniang te sibolan nepenò te wayeg. Taking kaw kandin.

<sup>14</sup> Aw domateng sikandin doton te balay, ikagi kaw diyà te tig-apò, ‘Insogò kay te Pengolo amon meg-insà kay kamno aw kenan se kànan te kedita day te Pista te Pegpelowà.’ <sup>15</sup> Penga niyan, ipekità din diyà kenyo se dakel gibelayan kidoen diatas te balay tapay doen telepagan impetagad kenitadon. Peg-inang kaw te kànen tadon kidoen.”

<sup>16</sup> Penga niyan, nesayo se didowa tinoledaan din aw dimoton dan te Jerusalem. Kinità dan se kedita iling te tapay inikagi i Jesus diyà kandan. Penga niyan, mig-inang dan te kànen.

<sup>17</sup> Pegkedelem niyan, dimoton si Jesus aw kedita te sempolò teg dowà tinoledaan din. <sup>18</sup> Dalem te kimaen dan, minikagi si Jesus, “Eneng-enengi niyo se kagi ko kenyo seini. Doen sebad kenyo megtolok kanak, aw kimaen sikandin doma ko.”

<sup>19</sup> Nepuluk se pedowan dan, aw migpetibos-tibosay dan mig-insà diyà kandin, kagi dan, “Kenà ko lay lebò?”

<sup>20</sup> Minikagi si Jesus, “Yan se sebad diyà te sempolò teg dowà kenyo. Timogen sikandin kanak.  
<sup>21</sup> Metoman a imetayan, so yan se kagi te Timanem insolat gebii tepad kanak Timanem Migpekeotaw. Meneng mekelelayò se otaw megtolok kanak. Mèpiya peden aw wedà sikandin tebaw.”

*Pegkaen te pengilala te pegkematay te Pengolo*

*Mar. 14:22-26; Mat. 26:26-30; Luc. 22:15-20; 1Ko. 11:23-25*

<sup>22</sup> Nayan, dalem te pegpengaen dan, nengabat si Jesus te pan, aw migpesiontong sikandin diyà te Timanem. Penga niyan, binelà-belà din se pan, aw inteped din iyan diyà kandan, aw minikagi sikandin, “Kàni niyo se pan seini, so yan se lawa ko.”

<sup>23</sup> Penga niyan, inabat din heman se tabò, aw migpesiontong sikandin diyà te Timanem, aw inteped din heman diyà kandan, aw mininem se kedita dan kenyan. <sup>24</sup> Minikagi si Jesus, “Yan se dipanog ko, aw pineokit kani, doen den kaling peokit pesalo doton te Timanem. Pineokit te pegkematay ko, medita se otaw tebanagan. <sup>25</sup> Eneng-enengi niyo se kagi ko kenyo seini. Eked a todà inem te ininem tadon seini singed aw metoman kidon minem te kaling bino doton te peglowan te Timanem.”

<sup>26</sup> Penga niyan, migdelangan dan tepad te pegduyun dan te Timanem, aw nesayo dan lekat ki-doen, aw dimoton dan te bontod te Olibo.

*Inikagi i Jesus se pegbolon i Pedro kandin*

*Mar. 14:27-31; Mat. 26:31-35; Luc. 22:31-34; Juan 13:36-38*

<sup>27</sup> Penga niyan, minikagi si Jesus diyà te menge tinoledaan din, “Tomanan se kedita niyo kanak, so doen kagi te Timanem insolat gebii, ‘Ipeimatay ko se otaw egtonggò te ayam-ayam karniro, aw mebilit se kedita te karniro tinonggoan din.’

<sup>28</sup> Meneng penga te pegkeantay ko lekat te nematay, mekeonà a diyà kenyo doton te Galiliya.”

<sup>29</sup> Minikagi si Pedro diyà ki Jesus, “Pengkey tomanan se kedita te doma kamno, meneng eked a palos tanan kamno.”

<sup>30</sup> Minikagi si Jesus, “Eneng-enengi se kagi ko kamno seini. Kwani te eked pegkolaak se manok te mekedowa te delem seini, ibolon a nikaw te meketelo.”

<sup>31</sup> Meneng ontò minikagi si Pedro, “Eked a palos pegbolon kamno, pengkey imetayan a sipat kamno.”

Iling heman kenyan se inikagi te kedita te tinoledaan i Jesus.

*Migtawal-tawal si Jesus kidoen te Gitsimani*

*Mar. 14:32-42; Mat. 26:36-46; Luc. 22:39-46*

<sup>32</sup> Nayan, dimoton dan te kekeyowan iningedanan Gitsimani. Pegdateng dan doton, minikagi si Jesus diyà te menge tinoledaan din, “Pegtagad kaw dini, so domoton a sida amon megtawal-tawal a.”

<sup>33</sup> Penga niyan, impetaking din si Pedro, aw si Santiago, aw si Juan. Ontò den nepuluk se pedowan din, <sup>34</sup> aw minikagi sikandin, “Ontò den nepuluk se pedowan ko, iling te matay a. Peg-ogpà kaw den dini, aw ikà niyo egtedogi.”



<sup>35</sup> Penga niyan, dimeleg si Jesus te kenà mediyò, aw limemlem sikandin aw migtawal-tawal. Nemoyò sikandin diyà te Timanem aw mepakay diyà kandin, eked din peden sikandin peokiti diyà te kelimahan agpet domateng diyà kandin.

<sup>36</sup> Migtawal-tawal sikandin, kagi din, “Amà, wedad palos eked no kebatog. Yan eked a no peden peokiti diyà te kelimahan seini. Meneng ibeg ko, kamno ibeg se metoman, kenà kanak.”

<sup>37</sup> Peglikò din doton te tinoledaan din, time-dogi den dan. Linoka din sikandan aw minikagi sikandin diyà ki Pedro, “Simon, nepela a den kenyo, so timedogi kaw. Wedà kaw kedi peketayod te sebad olò oras. <sup>38</sup> Ikà niyo egtedogi, meneng pegtawal-tawal kaw amon eked kaw keboyo. Pengkey mèpiya se ibeg te pedowan niyo, meneng wedad kagsen te lawa niyo.”

<sup>39</sup> Todà migpekediyò-diyò si Jesus aw migtawal-tawal. Onawa heman se intawal-tawal din.

<sup>40</sup> Todà limikò si Jesus doton te menge tinoledaan din, aw kinità din dan timedogi, so ontò dan nepilot. Wedà dan ketegahi aw eden se itaba dan kandin.

<sup>41</sup> Peglikò i Jesus doton kandan te iketelo, minikagi sikandin, “Nepela a so gayed kaw timedogi. Na, botong den iyan, so dimateng den se oras te pegtolok kanak Timanem Migpekeotaw amon dekepen a te menge otaw nelegeb te salà. <sup>42</sup> Enaw kaw den. Dimateng den se otaw megtolok kanak. Somongon kidon kandin.”

*Pegdakep ki Jesus*

*Mar. 14:43-52; Mat. 26:47-56; Luc. 22:47-53; Juan 18:3-12*

<sup>43</sup> Telobo pa minikagi si Jesus, pegketà dimateng si Judas, sìyan tinoledaan i Jesus. Medita se otaw timaking kandin, aw migkekamang dan te menge podok aw batota. Insogò dan te menge pengolo te simbahan aw menge menenoladà te punù ingkeliwat i Moises aw menge obanen te Judiyo. <sup>44</sup> Tapay dan netegahan aw eden se inangen i Judas, so minikagi sikandin, “Se otaw edekan ko, yan se otaw inahà niyo. Dekepi niyo sikandin aw bentayi niyo sikandin te pegpengibing niyo kandin doton te otaw meg-osay kandin.”

<sup>45</sup> Nayan, pegdateng dan doton, wedà peg-alà-alà si Judas meneng dimoton ki Jesus, aw minikagi, “Sir.”

Penga niyan, inedekan din si Jesus. <sup>46</sup> Penga niyan, dinakep dan sikandin. <sup>47</sup> Meneng doen sebad tinoledaan i Jesus nenagnos te podok din aw tinigbas din se sineligan te ontò pengolo te simbahan, aw nepalot se dibaloy telinga din. <sup>48</sup> Penga niyan, minikagi si Jesus diyà kandan, “Kolang se pegkekamang niyo te podok aw batota amon megdakep kaw kanak, so kenà a megdedempasay. <sup>49</sup> Gayed a migtoladà doton te dakel simbahan, meneng wedà a niyo dekepi doton. Meneng keilangan metoman se kagi te Timanem insolat tepad kanak.”

<sup>50</sup> Penga niyan, kimadas se kedita te tinoledaan i Jesus, aw tinenanan dan sikandin.

<sup>51</sup> Doen sebad telaki timelokon ki Jesus olò migdiping. Dinakep dan heman sikandin, <sup>52</sup> meneng nekelowà, so tinenanan din se dipping din aw kimadas migpetabeg-tabeg.

*Inibing si Jesus doton te menge pengolo te simbahan*

*Mar. 14:53-65; Mat. 26:57-68; Luc. 22:54-55,63-71; Juan 18:13-14,19-24*

<sup>53</sup> Penga niyan, inibing dan si Jesus doton te ontò pengolo te simbahan. Tapay netipon kidoen se menge pengolo te simbahan, aw menge obanen te Judiyo, aw menge menenoladà te punù ingkeliwat i Moises. <sup>54</sup> Timelokon heman si Pedro, meneng migpekediyò sikandin lamig dimateng doton te dowangen te balay te ontò pengolo te simbahan. Nenenoo sikandin doma te menge otaw migtonggò te dakel simbahan, aw mig-ingadang sikandin diyà te apoy dan.

<sup>55</sup> Nayan, ibeg te menge pengolo te simbahan aw menge doma dan obanen, doen inangan dan si Jesus te salà amon doen tindegan te pegpeimatay dan kandin. Meneng wedad palos salà din kinità dan. <sup>56</sup> Pengkey medita se otaw migkebolalaw tepad kandin, meneng kenà onawa se in-indan dan. <sup>57</sup> Doen menge otaw migkebolalaw tepad kandin, kagi dan, <sup>58</sup> “Dineg day se inikagi din te mekebatog sikandin megbaet te dakel simbahan sida ininang te otaw, aw ipetideg din se kaling simbahan eked inangi te otaw dalem te telo se aldaw.”

<sup>59</sup> Pengkey yan se in-indan dan tepad kandin, meneng kenà onawa se in-indan dan. <sup>60</sup> Penga niyan, timideg se ontò pengolo te simbahan aw mig-insà diyà ki Jesus, “Eden lay se itaba no kenyan? Indani kay aw benal se inikagi dan.”

<sup>61</sup> Meneng wedà taba si Jesus. Minikagi heman se ontò pengolo te simbahan, “Sikona ekon se

Misiyas, siyan Batà te Timanem. Indani kay den aw benal iyan.”

<sup>62</sup> Minikagi si Jesus, “Benal iyan. Komità kaw kanak Timanem Migpekeotaw egpenenoo kidoen te tangkil te Amay ko metolos amon lomowan a doma din. Lomikò a heman dini lekat te langit tekingan te labon.”

<sup>63</sup> Penga niyan, miglisi se ontò pengolo te simbahan te saol din tandà te keopal din, aw minikagi sikandin, “Wedad den kekemowan te pegindan te doma otaw diyà kenitadon tepad kandin, <sup>64</sup> so dinineg tadon den se pegtompuyus din te Timanem pineokit te pegpelingo-lingo din Batà te Timanem. Na, eden lay se aneng-aneng niyo tepad kandin?”

Penga niyan, minikagi se kedita dan te keilangan imetayan sikandin so doen salà din. <sup>65</sup> Lekat niyan, tineptepan dan sikandin, aw doen nenampeng te mata din aw nenombag kandin, aw minikagi dan, “Na, etoki aw sinu se nenombag kamno.”

Nenombag heman kandin se menge otaw migtonggò te dakel simbahan.

### *Imbolon i Pedro si Jesus*

*Mar. 14:66-72; Mat. 26:69-75; Luc. 22:56-62; Juan 18:15-18,25-27*

<sup>66</sup> Dalem niyan, mig-ogpà si Pedro kidoen te dowangen. Doen bayi egtelaban te ontò pengolo te simbahan minokit kidoen te dowangen. <sup>67</sup> Pegkità din ki Pedro mig-ingadang kidoen te apoy, mininoet sikandin aw minikagi, “Sikona se egdoma ki Jesus tege Nasarit.”

<sup>68</sup> Meneng migbolon si Pedro, kagi din, “Wedà ko ketegahi aw eden se eg-ikegiyen nikaw.”

Penga niyan, minalin si Pedro doton te dapag te dalan, aw migkolaak se manok. <sup>69</sup> Wedà kenamay, todà kimità se bayi sìyan ki Pedro aw minikagi diyà te menge otaw kidoen, “Sebad heman sakop din se otaw seini.”

<sup>70</sup> Meneng todà migbolon si Pedro.

Penga niyan, te wedà kenamay, doen menge doma otaw kidoen minikagi diyà ki Pedro, “Benal sikona se sebad egdoma te otaw sida dinakep, so tege probinsya ka te Galiliya.”

<sup>71</sup> Meneng ontò migsapà si Pedro aw minikagi, “Wedà a palos kilala te otaw eg-ikegiyen niyo sìyan.”

<sup>72</sup> Pegketà, migkolaak se manok te ikedowa. Yan neeneng-enengan i Pedro se tapay inikagi i Jesus te ibolon din sikandin te meketelo te eked pa pegkolaak se manok te mekedowa. Penga niyan, ontò sikandin migkelag.

## 15

### *Inibing si Jesus doton ki Pilato*

*Mar. 15:1-5; Mat. 17:1-2,11-14; Luc. 23:1-5; Juan 18:28-38*

<sup>1</sup> Nayan, peglibtak te aldaw sìyan, netipon se kedita te pengolo te simbahan, aw menge obanen te Judiyo, aw menge menenoladà te punù ingkeliwat i Moises. Netipon se kedita dan amon meglalang dan aw eden se inangen dan. Penga niyan, ginapos dan si Jesus, aw inibing dan sikandin doton te gobirnadador si Pilato.

<sup>2</sup> Pegdateng dan doton, mig-insà si Pilato ki Jesus, kagi din, “Sikona lay se Selotan te munge Judiyo?”

Timaba si Jesus, “Ee. Benal se kagi nikaw.”

<sup>3</sup> Penga niyan, medita se indimanda te munge pengolo te simbahan tepad kandin. <sup>4</sup> Minikagi heman si Pilato, “Medita se indimanda dan tepad kamno. Eden lay se itaba no kandan?”

<sup>5</sup> Meneng wedà den taba si Jesus, aw yan se doun te nepela si Pilato.

*Pig-okom si Jesus te imetayan*

*Mar. 15:6-15; Mat. 27:15-26; Luc. 23:13-25; Juan 18:39–19:16*

<sup>6</sup> Nayan, kelikit te Pista te Pegpelowà, doen ketanem te gobirnadador te ipelowà din se sebad otaw kineleboso, pengkey sinu se pemellien te kedita te otaw. <sup>7</sup> Na, dalem niyan, doen munge ribildi kineleboso, so nemonò dan te otaw te peg-ato dan te gobirno. Doen sebad kandan iningedanan ki Barabas. <sup>8</sup> Pegketipon te medita otaw, nemoyò dan ki Pilato amon ipelowà din se otaw kineleboso, so yan se ketanem din. <sup>9</sup> Penga niyan, mig-insà si Pilato, “Meibeg kaw lay aw ipelowà ko se Selotan te munge Judiyo?”

<sup>10</sup> Yan se inikagi i Pilato, so netegahan din te impedakep te munge pengolo te simbahan si Jesus so mingà dan kandin. <sup>11</sup> Meneng gayed migdeliseg se munge pengolo te simbahan diyà te otaw netipon kidoen amon ipelowà din si Barabas aw eked din pelowai si Jesus. <sup>12</sup> Mig-insà heman si Pilato, “Menonen ko sikandin egtewalen niyo Selotan te munge Judiyo?”

<sup>13</sup> Migbelobansag dan heman, kagi dan, “Imetayi sikandin. Lensangi diyà te kros.”

<sup>14</sup> Mig-insà si Pilato, “Nengà lay? Eden lay se salà ininang din?”

Meneng labi pa dakel se kagi dan, aw migbelobansag dan, “Imetayi sikandin. Lensangi diyà te kros.”

<sup>15</sup> Penga niyan, impelowà i Pilato si Barabas lekat te keleboso, so ibeg din meluba se medita otaw netipon. Impebadas din si Jesus, aw impeibing din amon ilansang diyà te kros.

*Tinompuyus te menge sondalo si Jesus*

*Mar. 15:16-20; Mat. 27:27-31; Juan 19:2-3*

<sup>16</sup> Penga niyan, inibing te menge sondalo si Jesus doton didalem te balay te gobirnadór, aw migtipon dan te kedita te doma dan sondalo. <sup>17</sup> Penga niyan, pineseolan dan sikandin te melalag saol iling te saol te selotan. Linekò dan se belagen doen tigus aw yan se insangkob dan diyà te olo din iling te korona te selotan. <sup>18</sup> Penga niyan, migpelingo-lingo dan te egsegmanen dan sikandin, kagi dan, “Iduyun sikona Selotan te menge Judiyo.”

<sup>19</sup> Penga niyan, binadas dan se olo din te tigbaw, aw tineptepan dan sikandin. Limongken dan heman diyà kandin aw migpelingo-lingo dan te sikandin se selotan egsegmanen dan. <sup>20</sup> Penga te pegtompuyus dan kandin, linowas dan se melalag saol lekat kandin, aw impesaol dan diyà kandin se kandin saol. Penga niyan, inibing dan sikandin lekat te balay te gobirnadór amon ilansang diyà te kros.

*Inlansang si Jesus diyà te kros*

*Mar. 15:21-32; Mat. 27:32-44; Luc. 23:26-43; Juan 19:17-27*

<sup>21</sup> Nayan, kidoen te dalan, netelaan te menge sondalo se sebad tege Sirene kaling dimateng lekat te saka. Ngadan din si Simon, aw batà din si Alejandro aw si Rufo. Lineges dan sikandin neniang te kros. <sup>22</sup> Inibing te menge sondalo si Jesus doton te bontod iningedanan Golgota. (Se kelebadan niyan, “Tòlan te Olo.”) <sup>23</sup> Pegdateng dan doton, imbegay te sondalo diyà ki Jesus se bino siningedan te bebolong te saka iningedanan mira amon eked din imenmani se kesakit. Meneng wedà din inemi. <sup>24</sup> Penga niyan, inlansang dan sikandin diyà te kros. Penga niyan, pigtalad-talad te menge sondalo se penenaktun linowas din, aw migbonot dan aw eden se penenaktun meabat te teg sebad-sebad kandan. <sup>25</sup> Menge alas nowibi se oras te peglansang dan kandin diyà te kros. <sup>26</sup> Doen solat tepad te indimanda kandin insawol dan kidoen, kagi niyan, “Seini se Selotan te menge Judiyo.”

<sup>27</sup> Doen heman dowà megdedempasay inlansang diyà te kros kidoen te tangkil din, aw si Jesus diyà te tengà-tengà. [ <sup>28</sup> Yan netoman se kagi te Timanem insolat gebii, “Ipelumun sikandin iling te otaw dakel se salà.”]

<sup>29</sup> Migtompuyus kandin se menge otaw minokit diyà te dalan medapag kidoen. Migkiling-kiling dan te olo dan te pegsila dan kandin, aw minikagi dan, “Ehe. Minikagi ka te mekebatog ka megbaet te dakel simbahan sida, aw todà no iyan ipetindeg dalem te telo se aldaw. <sup>30</sup> Na, aw mekebatog



ka kenyan, pekitai diyà kenami te doen tolos no pineokit te pegtabang no te kamno pegkeotawun amon eked ka kematay. Tenà ka den lekat te kros.”

<sup>31</sup> Iling heman kenyan se pegtompuyus te menge pengolo te simbahan, aw menenoladà te punù ingkeliwat i Moises. Minikagi dan, “Migtabang sikandin te menge doma otaw netigdaan amon eked dan pa kematay. Meneng eked den sikandin peketabang te kandin pegkeotawun amon eked kematay. <sup>32</sup> Aw benal sikandin se Misiyas aw Selotan te menge bowad-bowad i Israel, mekebatog sikandin tomenà lekat te kros dalem te pegtengteng tadon kandin, amon memenal kidon kandin.”

Iling heman kenyan se pegtompuyus te doma otaw inlansang diyà te kros kidoen te tangkil din.

### *Pegkematay i Jesus*

*Mar. 15:33-41; Mat. 27:45-56; Luc. 23:44-49; Juan 19:28-30*

<sup>33</sup> Nayan, pegkealas dosi te aldaw, migkengitngit se langit aw tanà lamig alas tris te meapon.

<sup>34</sup> Menge alas tris te meapon, timawal si Jesus te dakel se kagi din, kagi te Hebreo, “Eloi, Eloi, lama sabaktani?” Se kelebadan niyan, “E Timanem ko, nengà lay tinenanan a nikaw?”

<sup>35</sup> Pegdineg te menge otaw netipon kidoen, minikagi dan, “Na, nengenganay den sikandin diyà ki Elias, sỳyan telekeliwat te kagi te Timanem gebii.”

<sup>36</sup> Doen otaw ayas minangay te ispongha aw inagem din iyan diyà te bino sinengedan te wayeg. Intangen din iyan diyà te toktok te tigbaw, aw

impesopsop din iyan ki Jesus. Minikagi heman se otaw, “Pebeyai niyo sikandin, so kitaen tadon aw domini si Elias amon mengabat kandin.”

<sup>37</sup> Penga niyan, timawal si Jesus te dakel se kagi din, aw penga niyan nematay.

<sup>38</sup> Nayan, tigkan nelisi se kayad kidoen te tengà-tengà te dakel simbahan te Jerusalem. Nelisi iyan lekat diatas lamig diyà te ongan. <sup>39</sup> Gayed timengteng se kapitan te sondalo ki Jesus, aw pegkità din te pegtawal din aw pegkematay din, minikagi sikandin, “Ontò Batà te Timanem se otaw siyan.”

<sup>40</sup> Doen heman minge bayi kidoen kenà mediyò te kros, aw kinità dan se kedita te neinang. Sikan-dan si Maria tege Magdala, aw kesangay din si Maria inay te kaling otaw si Santiago aw si Jose. Kidoen heman si Salome. <sup>41</sup> Sikandan se tapay timaking ki Jesus te peglegeb din kidoen te probinsya te Galiliya amon megtabang dan kandin. Medita heman se doma dan bayi timaking ki Jesus te pegdoton din te Jerusalem.

### *Peglebeng ki Jesus*

*Mar. 15:42-47; Mat. 27:57-61; Luc. 23:50-56; Juan 19:38-42*

<sup>42-43</sup> Agpet den somallep se aldaw, aw keel-dawan niyan se Sebado aw aldaw te peg-etod. Doen otaw si Jose tege Arimatiya. Sikandin se sebad obanen egsegmanen te minge doma din obanen eglowan diyà te minge Judiyo, aw egpeliman sikandin te peglowan te Timanem. Pegkeapon niyan, impesalig din se pedowan din, aw dimoton ki Pilato, aw pinemoyò din se lawa i Jesus amon

ilebeng din. <sup>44</sup> Nepela si Pilato te nematay den si Jesus. Yan se doun te impeangay din se kapitan te sondalo, aw mig-insà kandin aw nematay den si Jesus. <sup>45</sup> Peg-ikagi te kapitan te benal nematay den si Jesus, migpunù si Pilato te mepakay aw ebaten i Jose se lawa din. <sup>46</sup> Penga niyan, bineyadan din se sapot, aw inabat din se lawa lekat te kros, aw ginakes din iyan te sapot, aw inlebeng din kidoen te lebeng impeawang diyà te pangpang. Penga niyan, kinelid din se dakel bato amon isampeng te lebeng. <sup>47</sup> Timaking heman si Maria tege Magdala aw kesangay din si Maria inay i Jose, aw kinità dan se linebengan te lawa.

## 16

### *Pegkeantay i Jesus*

*Mar. 16:1-8; Mat. 28:1-8; Luc. 24:1-12; Juan 20:1-10*

<sup>1</sup> Nayan, penga te aldaw te peg-etod, migpedomà-domaay si Maria tege Magdala, aw kesangay din si Maria inay i Santiago, aw si Salome. Minayad dan te metinadeg amon doen itoyong dan diyà te lawa i Jesus. <sup>2</sup> Peglibtak te aldaw te iselem te Linggo, dimoton dan te lebeng. <sup>3</sup> Te wedà dan pa dateng doton, migpeinsaay dan, kagi dan, “Sinu lay se mengelid te bato insampeng te lebeng amon mekeawop kidon?”

<sup>4</sup> Meneng pegtengteng dan, kinità dan te tapay den nekelid se bato insampeng. Ontò dakel se bato siyan. <sup>5</sup> Penga niyan, minawop dan diyà te lebeng, aw kinità dan se anghil nenaol te mepoti aw nenenuo lenged te kowanan dan. Nepela se menge bayi. <sup>6</sup> Penga niyan, minikagi se anghil,

“Ikà niyo egkepela. Netegahan ko te inahà niyo si Jesus tege Nasarit, siyan inlansang diyà te kros. Wedad den sikandin dini, so neantay den lekat te nematay. Tengtengi niyo den se linebengan kandin. <sup>7</sup> Na, doton kaw den ki Pedro aw menge doma tinoledaan i Jesus, aw indani niyo dan te nekeonà den si Jesus diyà kenyo pesalo doton te probinsya te Galiliya. Kitaen niyo sikandin doton, so yan se inikagi din kenyo.”

<sup>8</sup> Penga niyan, limowà dan lekat te lebeng aw kimadas dan, so tinegangtang dan, aw ontò dan nepela. Wedad palos otaw inindanan dan tepad te kinità dan, so nelemitan dan.

*Migpekità si Jesus ki Maria tege Magdala  
Mar. 16:9-11; Mat. 28:9-10; Juan 20:11-18*

[ <sup>9</sup> Nayan, penga te pegkeantay i Jesus lekat te nematay te iselem te Linggo, si Maria tege Magdala se tagnà pinekitaan i Jesus. Sikandin se tapay pinelowaan i Jesus te pito se bosaw. <sup>10</sup> Dimoton sikandin te menge tinoledaan i Jesus. Gayed dan nepuluk aw migkelag dan. Meneng mig-indan si Maria diyà kandan aw eden se kinità din. <sup>11</sup> Pegdineg dan te neantay den si Jesus lekat te nematay aw kinità din den sikandin, wedà dan pemenal kenyan.

*Migpekità si Jesus diyà te doma tinoledaan din  
Mar. 16:12-13; Luc. 24:13-35*

<sup>12</sup> Penga niyan, migpekità si Jesus diyà te didowa tinoledaan din te peg-ipanaw dan pesalo doton te saka, meneng wedà dan sikandin kilelai, so netodà den se bawa din. <sup>13</sup> Pegkilala dan

kandin, limikò dan doton te Jerusalem, aw migindan dan diyà te minge doma tinoledaan din. Meneng wedà dan pa pemenal kandan.

*Migpekità si Jesus diyà te sempolò tegusà tinoledaan din*

*Mar. 16:14-18; Mat. 28:16-20; Luc. 24:36-49; Juan 20:19-23; Ininang 1:6-8*

<sup>14</sup> Penga niyan, migpekità si Jesus diyà te sempolò tegusà tinoledaan din dalem te pegpengaen dan. Simila sikandin kandan so wedà dan pemenal aw magsen se olo dan, so wedà dan pemenal te kagi te minge otaw kimità kandin penga te pegkeantay din lekat te nematay. <sup>15</sup> Penga niyan, minikagi si Jesus, “Doton kaw den te kebelad te keneyonan. Pegtoladà kaw te Mèpiya Indan tepad kanak diyà te kedita te otaw. <sup>16</sup> Aw memenal se otaw kenyan, aw megpebonyag, ipelowà sikandin lekat te salà. Meneng aw eked pemenal se otaw, ipelumun sikandin. <sup>17</sup> Seini se minge pengilala inangen te minge otaw egpemenal kanak. Megpelowà dan te bosaw lekat te otaw pineokit te ngadan ko. Mikagi dan heman te kagi eked kelebeti. <sup>18</sup> Pengkey mekeawid dan te memokan, pengkey mekeinem dan te mekeilo, eked dan elegi. Aw memaed dan te minge otaw doen mesakit, kegolian dan.”

*Neengat si Jesus doton te langit*

*Mar. 16:19-20; Luc. 24:50-53; Ininang 1:9-11*

<sup>19</sup> Nayan, penga te peg-ikagi i Jesus diyà kandan, neengat sikandin doton te langit, aw nenenuo ki-doen te tangkil te Timanem amon lomowan doma din. <sup>20</sup> Penga niyan, nesayo se minge tinoledaan

i Jesus lekat te Jerusalem aw migtoladà dan kidoen te kebelad te keneyonan, pengkey kenan dan pesalo. Tinebangan dan heman te Pengolo, so impetaga-taga din te benal se intoladà dan pineokit te menge pengilala ininang dan.]

## **Se kaling peokit New Testament in Manobo, Sarangani**

copyright © 1982 Wycliffe Bible Translators, Inc.

Language: Sarangani Manobo (Manobo, Sarangani)

Translation by: Wycliffe Bible Translators

Contributor: Wycliffe Bible Translators, Inc.

### **Copyright Information**

© 1982, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Manobo, Sarangani

© 1982, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
c20d3497-5ef1-5827-a247-7f05c229fef7